

ANG MGA GASA SA DIOS

KANUNAY'NG NAGATULTOL

SA ILANG MGA DAPIT



Salamat, Igsoong Neville. [Nagaingon si Igsoong Neville, “Panalanginan ka sa Dios, igsoon.”—Ed.] Panalanginan ka sa Ginoo, igsoon.

Maayong gabii, mga higala. Bag-o lang ko miabot, kaganina lang, ug nahunahuna nako nga moari ug manghinaut kaninyong tanan og “Malipayong Pasko”.

² Ug wala gyud ko kabalo nga mahatagan ko niining dakung pribilihiyo nga makapamulong kaninyo mahitungod sa Pulong sa Ginoo. Ug gihangyo ko ni Igsoong Neville, ug aduna man pud ko’y pipila ka mubong mga teksto nga pang-Pasko nga ako nang nawali, ngani ang usa sa mga niini naipamulong na nako didto sa—sa Phoenix ug didto sa Tucson, sa nagkalainlaing mga dapit didto, usa ka regular nga mensahe para sa Pasko. Ug nahunahuna nako, karong gabhiona, nga mamulong lang ko og gamay’ng butang dinhi nga gibutang sa Ginoo sa akong hunahuna bag-o lang, samtang didto ako sa Colorado.

³ Ug adunay akong gipamalandongan kaniadtong panahon sa Pasko, ug aduna ko’y mga lima o unom ka gagmay nga mga punto nga akong nasulat dinhi, mga Kasulatan ug mga ingon-anang butang. Ang . . . dili lang ako . . . tingali ingon-ana pud ang ginabuhat ni Igsoong Neville ug sa tanang mga ministro. Ikaw . . . kana bang kalit lang nga adunay moabot nga butang sa imo, ug imo dayong isulat. Maghulat-hulat lang ka, ug imo kining isulat. Ginasulat ko kini sa usa ka pad nga papel, sa usa ra ka pad nga papel. Dayon kung kalit lang kong tawgon aron mamulong, ako kining balikan ug moingon, “Unsa gani kadtong akong naisulat?” Ingon-ana gyud, kung kalit ra kami nga tawgon, kabalo na mo.

⁴ Sa una, ako . . . niadtong bata-bata pa ko, dali ra ko . . . ang akong panghunahuna, makahinumdum ako dayon, ug dili na ko kinahanglan nga maghulat, dali ra ko makahinumdum “Napulo ka adlaw ang milabay atua ko sa usa ka dapit, sa usa ka piho nga dapit. Mao kana ang teksto. Ingon niani kini, ug ania ang nahitabo.”

⁵ Kabalo mo, sukad nga nalabyan ko ang pipila ka dagkung mga kahitaboan sa akong kinabuhi, Igsoong Higginbotham, ug natabok ang pipila ka mga suba, wala na kini nagakahitabo sa

ingon niana nga paagi, sa diha nga medyo halayo na ang atong nabiyaha. Apan kini . . . sama sa giingon ni Igsoong Neville, bag-ohay lang, “Nagkaduol na kita, nagkaduol na kita sa atong Pagpamauli.”

⁶ Maayo gyud ang makabalik sa imong kaugalingong dapit. Pagpauli nako, aba, grabe gyud ang niyebe. Ug adunay . . . ug nadungog ko ang mahitungod sa mga aksidente ug uban pang mga panghitabo, daghan kaayo ang nadisgrasya diha sa dalan, ug adunay mga tawo nga nangamatay. Ug hunahunaa na lang kung pila pa ka gatus ang mamatay karon, gikan karong gabhiona hangtud sa pagtapos sa Bag-ong Tuig, pila pa ka mga Amerikano ang mamatay! Ug kabalo mo, ang uban niana tingali’g ania lang mismo dinhi, karong gabhiona. Ug nagadepende ra gyud kini karon, diha . . . sa atong kahimtang atubangan sa Dios. Usa kini ka nagmasulob-on nga nasud, ingon pa sa usa ka igsoon, tungod kay adunay kasubo sa tanang dapit. Ug ang atong bandera nagbitay na, sulod sa traynta ka adlaw, nga anaa ra sa tunga sa palo, tungod sa sala ug sa mga tawo nga dili modawat sa pamaagi sa Dios mahitungod sa—sa—sa mga butang.

⁷ Bisan pa kon dili kita uyon sa usa ka tawo, kon dili gihapon nato kini mabuhat sa inigsoong pamaagi, ug dayon . . . Kita n’yo, kung anaa si Cristo sa kasingkasing, bisan pa’g supak kaayo ka sa usa ka tawo, aduna gihapon ka’y gugma para kaniya ug pagtahud. Daghan pud gani ko’g wala giuyonan nga mga tawo, sa makadaghang higayon. Pero bisan pa niana, wala pa gyud ko’y nakita nga usa ka tawo nga dili man ako uyon kaniya wala nalahi ang akong pagtagad kaniya kondili “agbayan ko pa gani siya ug tawagon siya’g ‘igsoon ko,’ ug tabangan siya kutob sa akong mahimo.” Wala ko mouyon kaniya tungod kay nagtoo ko nga basin sa ko dili pag-uyon siya’y . . . Kung unsa man ang iyang ginatoohan, nga wala nako toohi sama sa iyang pagtoo niini, apan . . . ug uban pa, apan karon siguro ako na lang paningkamotan nga ipakita kaniya ang akong punto ug iya usab ipakita kanako ang iyang punto, unya among itakdo kining duha ug tan-awon kung unsay aduna kanamo, apan mga ingon-ana lang unta nga dili pagsinabtanay. Diha ra gyud unta kutob . . . dili na unta kita angay masuko o gusto pang manakit, o mangdaut o unsa pa man. Ang angay natong buhaton kanunay mao ang manglig-on.

⁸ Mora’g bugnaw kaayo ang panahon nato dinhi, dili ba? Setenta’y-dos ang temperatura niadtong mibiya ko sa Tucson, ug bisan misalop na ang adlaw ug migabii na, saisenta’y-nuebe ra gihapon. Busa, pagbalik nako dinhi, grabe gyud ang akong pagpangurog, kabalo mo. Ako . . . Tungod nianang niyebihon nga dalan, temperatura nga ubos pa sa zero, ug niyebe ug tanan na, kinahanglan na sad nakong maanad niini. Katingalahan gyud nga dali ra kaayo mausab ang imong “naandan nga klima” sa—

sa ingon ka mubo nga panahon. Ug sukad nga mibiya ko ninyo dinhi, wala pa gyud ko nakabawi sa akong gibati. Nagkaaduna ko og . . . mora'g sinus tungod sa—sa klima dinhi, ug samtang nagakatigulang na ko . . . Ug dinhi ra ba gyud ko natawo ug nagdaku. Apan kung, kita n'yo, kung batan-on ka pa, duna pa ka'y kusog, nga dili ka dali madutlan; apan inig magkatigulang ka na, aba, imo nang mabantayan nga mora'g adunay butang nga wala na diha. Sa una, puede ra nimong kalimtan. Ikaw . . . aduna gyud ka'y mabati nga—nga dili na nimo basta-basta balewalaon parehas sa una nga bata ka pa, busa ako kanang nasayran sa ingon—ana nga paagi nga ako . . . kanang init nga klima, para sa usa ka tigulang, mora'g makatabang gyud gamay.

⁹ Nahinumdom ko nga moagi ko anang Utica Pike diha sa itaas, sa bata pa kaniadto (mga siete, otso, diyos, dose, katorse anyos ang panuigon), wala ko'y sapatos (pang-tennis ra) ug mga walo o napulo ubos sa zero ang temperatura, ug nagsul-ob ra ko'g sapatos nga pang-tennis, nanggawas pa gyud ang mga tudlo sa tiil. Ug dili . . . dili kana parehas karon anang maglakaw-lakaw lang sa dalan sama dinhi, kondili molusbog gyud ka sa niyebe. Wala na'y mga sakyanan nga nagaagi, tingali usahay aduna ka'y makita nga marka sa ligid sa bagon. Moagi ko anang lapad nga kalsada sa buntag, nagsul-ob lang og gamay nga karaan nga amerikana, wala pa'y sinina sa ilalum, ug gi-alpilerin lang og *ingon-ani*, mas maayo pa gani ang akong gisul-ob karon; mabasa ko pag-ayo hangtud sa tuhod, pero padayon ra gihapon ko sa paglakaw ug mora'g wala ra gyud kadto para nako. Kita n'yo, halos dili gani ko dutlan og sip-on. Apan kadto mga kuwarenta'y-singko na ka tuig ang milabay. Busa, nagkaanam na gyud og kaluya, layo na'g naabtan ug layo na ang nabiyahé, kabalo na mo, maong dili na kita makalahutay pareho sa una.

¹⁰ Nakita nako nga mihangad si Igsoong Capps. Bata pa kaayo ka para maghunahuna og ingon—ana karon. Ug hulat-hulat lang hangtud makaabot ka sa pangedaron namo ni Igsoong Neville, dayon—dayon mausab na gyud imong—imong panglantaw sa daghang mga butang, mora'g magkaanam gyud og kaluya.

¹¹ Bueno, nagkaaduna kita og daghang maanindot nga mga kasinatian diha sa Ginoo. Gipanalanginan kita sa Ginoo pag-ayo, ug mapasalamaton kaayo ko niana. Ug sa akong pagbalik, naghunahuna ko, tingali sa sunod nga Domingo, kon itugot sa Ginoo, gusto unta nako, kung okey lang kang Igsoong Neville, nga . . . magpahigayon ko'g panerbisyo, sa Dominggo sa buntag ug basin sa Dominggo sa gabii, usa ka panerbisyo sa pagpang-ayo sa Dominggo sa gabii. Sa Dominggo sa buntag adunay ko'y importante nga mensahe, kung tugotan ko sa Ginoo nga ipamulong kini. Wala pa ko'y nahunahunaan nga teksto . . . dili pa kompleto ang akong teksto, wala pa'y konteksto niini, tungod kay ako—ako . . . wala—wala pa'y unsa man, nga kapadayagan gikan sa Ginoo, kabalo na mo, apan sa kinaugalingon ko pa lang.

Ako—gusto ko nga ipahayag ang usa ka butang sa Dominggo nga akong gilauman nga makatabang og gamay paingon niining direksyon.

¹² Kinahanglan na ko nang moadto sa pagpang-misyon, ug halos kada adlaw puno na gyud ang akong eskedyul bisan asa. Mora'g naingon ni Billy sa ako, sumala sa eskedyul sa akong biyahe, nga aduna kono ko'y duha o tulo ka adlaw nga makapauli pa sa Abril paghuman nako nga mogikan dinhi, paingon sa Tucson, ug mora'g mao na gyud kana kung ingon-ana. Ug dayon hangtud na kana sa sunod nga Nobyembre, o kaha sa Oktubre, úsa pa ko makabalik dinhi gikan sa uban nga nasud.

¹³ Karon, duha na lang ka adlaw mag-Pasko na. Usa na lang diay, dili ba? Duha pa diay. Lunes . . . Martes diay ang Bisperas sa Pasko? Martes pa diay ang Bisperas sa Pasko. Dili ba makasubo gyud tan-awon nga kining mahinungdanon unta kaayo nga bakasyon, nga atong gipangandaman, gibuhat sa ingon-ani nga paagi nga pagpangandam? Usa kini ka makaluluoy nga butang, usa—usa—usa ka dinanghag nga buhat, ang hunahunaon nga—nga ang mga rabbit ug ang usa—usa ka tumotumo nga gitawag og, Kris Kringle, Santa Claus, ug tanan na, mao'y nagkuha sa tinuod nga bili kung unsa gyud unta ang Pasko.

¹⁴ Karon, kita wala . . . kita—wala ta kabalo, ug ako mismo dili gyud ko motoo . . . Gabiyahe ko ganina, anaa sa luyo ang akong asawa, ug ako . . . samtang nagabiyaha kami, nakapaminaw kami sa usa ka astronomo; nga karon, mitoo gyud sila mahitungod sa usa ka ideya nga gisulti sa usa ka astronomo kanako daghan, na kaayong mga tuig ang milabay, kaniadtong usa pa ako ka tigbantay sa mga pagpangayam dinhi sa Indiana. Matud pa nila . . . gahugpong kono ang mga bitoon, sama sa giingon sa unang astronomo kaniadto ug moporma kono kadto, ug matud pa nila kana usa lang ka natural nga butang nga nagakahitabo, sa akong pagkahinumdom sa iyang giingon karong gabhiona, sa matag walo ka gatus kono ka tuig, o mga ingon niana. Ug mobalik kini pag-usab, nga naglangkob sa: Sargas ug Jupiter, ug nakalimot ko; ug Mart- . . . Mars; dili, ako . . . dili diay kana mao. Mahitungod kini sa pipila ka mga bitoon kung unsa nga mora'g gatuyok sila'g paspas sa ilang orbit inig nakalumbay kini sa kalibutan, ug kining astronomo kaganina nagsulti nga usa ra kini ka natural nga butang. Apan ako—dili ko—dili gyud ko mouyon ana. Kay nagatoo ko nga kana usa ka supernatural nga butang, nga gibuhat mismo sa Dios. Siya, ang mga butang supernatural gayud sa Dios. Kay Siya mismo usa ka Supernatural.

¹⁵ Ug—ug gitan-aw ko ug nasayod ko nga pabalik na usab kini karon sa Abril, Ako . . . kung itugot sa Ginoo nga mabuhi pa ko hangtud niana, mag-singkwenta'y-singko anyos na ako niana. Kita n'yo? Ug ako—ako nahibalo sa . . . Apan kung akong dumdumon balik ang akong kinabuhi, ug nakahunahuna ko

kung asa gyud kaha kini nahitabo. Sukad niadtong among pinakaunang mga yanong pagsaulog sa Pasko, nga magsab-it pa kami og among mga medyas, ug si Mama magbutang og . . . Nakadawat ra gani siguro kami og tag-usa ka orange, ug duha o tulo kabuok nga kendi, ug malipayon na kaayo kadto nga Pasko para namo. Apan, kabalo mo, sila—sila nga mga bata nagapaabot gyud nga makadawat og mga regalo. Ato—atong masayraon nga—nga ang Pasko para sa . . . para gyud sa mga bata, nagapaabot gyud sila—sila nianang mga butanga niini nga panahon. Kini—kini nakasentro gyud sa mga kabataan. Apan sa tinuod lang para unta kini sa mga hamtong; alang unta kini sa pagpanudlo sa ilang mga anak kung unsa gayud ang tinuod nga Pasko.

¹⁶ Ug wala gayud ako nagatoo nga—nga si Cristo mahimong natawo sa ikabaynte-singko nga adlaw sa Disyembre, sa Judea, tungod kay mas bugnaw pa gani didto kaysa dinhi karon. Kita n'yo? Oh, ug unsaon man pagbantay sa mga magbalantay sa ilang mga panon sa karnero inig kagabii? Ug—ug dayon kadto pa gyung pagpangolekta og buhis ug tanan na, ug si Maria nga kinahanglan pang mobiyahe og layo, gikan pa didto sa Bethlehem paingon sa Judea, paingon sa Jerusalem, diay, didto sa . . . para sa buhis. Ako—ako—malisud gyud nako nga—nga—nga toohan kana. Gikan pa, kay sa akong pagkahibalo gikan pa siya sa Nazaret, ug busa niadtong . . . Unsaon man niana—niana pagkahitabo. Dili gyud kana puedeng—puedeng mahitabo, apan nagatoo hinoon ko nga si Cristo natawo sa tingpamulak, tungod kay sa tanang aspeto Siya usa gayud ka Cordero. Kita n'yo? Namatikdan ba ninyo, nga natawo Siya sa usa ka kamalig, ug wala sa usa ka balay?

¹⁷ Ug sa dihang gidala na nila Siya sa krus (niadtong uban), sumala sa atong nasayran, wala gyud giingon nga Siya ang nagdala kanila didto, apan sila ang nagdala Kaniya. Kabalo ba mo nga ang cordero o karnero kinahanglan pa gyud giyahan ngadto sa ihawan? Kini—dili kini moadto og iyaha lang ngadto sa ihawan, kinahanglan pa nimong—nimong dad-on kini didto. Ug kasagaran usa ka kanding ang nagadala sa karnero. Didto sa—didto sa mga ihawanan, aduna sila'y kanding. Ug katong kanding mag-una og lakaw padulong nianang dulhogan, hangtud mosunod niya kadtong karnero nga patyonon, ug pagkahuman molukso dayon ang kanding paggawas. Apan kung moabot na ang oras nga ang kanding na ang patyon, magsige gyud siya'g sipa-sipa (kay kinahanglan man siya nga mosulod) apan, siyempre, dili mo usab siya mabasol. Apan—apan katingad-an gyud nga—nga ang karnero kinahanglan pang pangunahan, ug Siya gipangunahan usab ngadto sa ihawan. Gipangunahan Siya nila. Kay Siya usa man ka Cordero. Ug nagatoo ako sa ingon niana tungod mao gyud kana ang kinaiyahan, ug ang mga karnero ginapanganak sa Marso,

Abril, ug sa ingon-anang mga bulana, dili na molapas og Mayo. Ug dili ko motoo nga mas sayo pa kana sa Marso ug molapas sa Mayo, basta anaa lang kana sa mga ingon niana.

¹⁸ Apan sa diha nga ang iglesia, ang Cristianismo, gikasal ngadto sa Romanismo, nga nahitabo didto sa Konseho sa Nicaea, sa dihang ilang gidawat. . . gidawat sa Romanong nasud ang Cristianismo ug gimugna nila kining ilang gitawag nga pang-tibuok kalibutan nga relihiyon, ang Cristianismo. Gimugna nila kining pang-tibuok kalibutan nga relihiyon, ug nanagsimba sila sa mga diosdios, ug adunay ilang dios-nga-adlaw.

¹⁹ Ug karon mismo, gikan sa—gikan sa ikabaynte-uno hangtud sa ikabaynte-singko, ang adlaw halos nagapabilin lang sa parehas nga agianan niini sa iyang paglabay. Unsa gani'y inyong tawag niana? Mora'g. . . Kahibalo man ko niana, pero dili lang nako mahinumduman. Kana bang ang adlaw—ang iyang. . . mora og—og motaas ang oras ug usahay momubo na pud, gikan sa ikabaynte-uno, tali sa ikabaynte-uno ug baynte-singko sa Disyembre. Oh, nalimtan ko na kung unsay tawag nila niini. Unsa? [Adunay nagaingon og “Eklipse?”—Ed.] Dili, ang eklipse man gud mao kanang molabay, ang adlaw ug bulan magdungan og agi. Mora'g mga ingon-ana, oh, hapit na unta nako—nako masulti kung unsa kini pero dili gyud nako mahinumduman. Apan bisan pa man, mao kana ang kahintang nga gitawag sa mga Romano nga dili paglihok sa adlaw sa iyang puwesto (mao kanang panahona nga ginapahigayon nila ang ilang mga sirko), gitawag kadto nga *adlaw'ng natawhan sa dios-nga-adlaw*. Ginasaulog nila kini gikan sa ika-baynte uno hangtud sa ikabaynte-singko sa Disyembre.

²⁰ Busa, tungod kay nakabig, ang Roma ngadto sa. . . gidawat nila ang Cristianismo, sa ilang pamaagi didto sa Roma, miingon dayon sila, “Buhaton nato ang mao ra nga pagsaulog, ug himoon kini nga *adlaw'ng-natawhan sa Anak sa Dios*.” Kita n'yo? Ang dios-nga-adlaw, ang adlaw'ng-natawhan ni Jupiter, ilang gipulihan og adlaw'ng-natawhan sa Anak sa Dios, kada ikabaynte-singko sa Disyembre, ug kana. . .

²¹ Apan unsa ma'y kalahian niana? Kita n'yo, karon kung kita. . . Bisan pa man og kini. . . bisan pa og kini ilang ginahimo sa Hulyo o Agosto, o bisan unsang petsaha pa kini isaulog, ang importante mao ang pagkasagrado sa paghinumdom nga “Ang Dios naghatag kanato og paglaum nga anaa kanato.”

²² Ug karon, moingon mo, “Bueno, silang tanan nagasaulog man uban ang Santa Claus ug nagapadayon sa ilang mga naandan na nga ginabuhat. aba, buhaton pud nato kini.” Dili, sir! Dili, dili kini usa ka paganong pagsaulog para kanato, usa kini ka sagrado nga takna. Kung wala pa'y Pasko, wala unta'y pagkabanhaw. Kung wala pa'y Pasko: wala unta'y gugma, wala

unta'y kalinaw, wala unta'y human niini alang sa magtotoo; kung walay Pasko.

²³ Ug karon, moingon na pud mo, “Bueno, kung ang tanang uban pa sa kalibutan, sila gani...” Bueno, kita n'yo, ang pagpangidlap sa kilat, diha sa madag-umon nga kalangitan, nagapakita nga aduna gihapon og kahayag bisan sa panahon sa kangitngit. Kining mga suga karong gabhiona mao'y nagapamatuod, nga mahimo gayud nga magkaadunay kahayag sa panahon sa kangitngit. Ug kanus-a man modan-ag ang kahayag sa pinakamaayo niini? Sa kangitngit. Sulayi'g pasiga kining mga suga inig adlawan pa, samtang nagasidlak pa ang adlaw, halos dili nimo mabantayan nga nagasiga diay kini. Apan bisan ang usa lang ka gamay, diyutay nga suga modan-ag gyud pag-ayo sa panahon sa kangitngit. Ug karon mao'y panahon sa kangitngit diin ang matag Cristohanon kinahanglan magpamatuod sa paglaum nga anaa kaniya, mahitungod kang Jesus Cristo ang Anak sa Dios; dili sa kung unsa nga Kris Kringle nga natawo kono kaniadto, kabalo na mo, ug kung unsa nga kahoy nga nagdan-ag kono ug milatas sa kalasangan niadtong usa ka gabii, usa ka tinumotumo nga sugilanon nga wala'y tinuod nga basihan. Apan bug-os gayud kita nga nagatoo sa gisaad nga Pulong sa Dios bahin sa moabot nga Mesias, ug Siya natawo sa adlaw sa Pasko, baynte... halos duha ka libo na ka tuig ang milabay, nga mao'y atong ginatoohan.

²⁴ Busa, karong gabhiona mamulong kita'g diyutay sa lahi nga paagi. Siguro nakapamulong na ang inyong pastor, ug mahimong mamulong na usab siya sa Miyerkules sa gabii kay ako—kabalo ko nga aduna siya'y gipadaplin og pipila ka mga teksto o unsa man, aron ihatag kanako kining entablado karong gabhiona. Ug gusto nako nga iya kining ipamulong, kay gusto usab nako nga maminaw kaniya.

Apan, sa dili pa nato kini buhaton karon, iduko nato ang atong mga ulo pag-usab sa makadiyut alang sa pag-ampo:

²⁵ Langitnong Amahan, niining sagrado nga higayon, samtang nagahunahuna kami mahitungod sa nagkalainlaing mga butang dinhi sa Kasulatan, nga bisan asa kami moadto, mibalik man kami sa Daang Tugon, nagasulti kini mahitungod sa maong adlaw nga ang Dios magapadala sa Iyang Anak. Kung unsa nga ang mga propeta kaniadto naggahin gayud sa ilang panahon aron ipropesiya ang Pulong sa Dios nga miabot kanila. Ug sila nagpropesiya sa ilang kapanahonan ug gisulti daan ang mga butang nga magakahitabo, ug nakita namo kining tanan nga natuman didto sa Bethlehem niadtong gabhiona sa dihang ang Dios nahigugma gayud sa kalibutan nga Iyang gihatag ang Iyang bugtong Anak. Ginapasalamatang Ka namo tungod niini.

²⁶ Ug karon, Ginoo, karong gabhiona sa among pagtigum dinhi aron—aron maghisgot sa Imong Pulong; ug sagrado kaayo

Kini, Ginoo, maong gusto namong makigsulti úsa Kanimo. Ug among ginapangamuyo nga Imong ablihan ang among panabot sa Imong Pulong. Sa Ngalan ni Jesus among ginapangamuyo kini. Amen.

²⁷ Karon gusto kong mobasa og pipila ka Kasulatan dinhi, usa ka regular nga pang-Pasko nga sugilanon, gikan sa Kasulatan nga makita sa—sa Mateo, sa ika-2 nga kapitulo. Ug samtang inyong ablihan kana, apil na usab ang Juan 3:16.

²⁸ Ug niadtong miaging gabii didto sa Phoenix...Kung kamong mga naga-teyp dinhi, mga nagapaminaw sa mga teyp, gusto kong maminaw kamo nianang teyp: *Nganong Kinahanglan Man Ni Jesus Nga Moadto Sa Bethlehem*. Nganong kinahanglan man gyud Niyang buhaton kini? Ug kadtong mga simbolo ni David, nga nagapaniid ug—ug nagahulat ibabaw sa bukid, nagalantaw sa ubos ug nakita ang mga Filistehanong kasundalohan nga nagkampo sa ubos. Ug nakumpara ko kana sa ingon ka eksakto karong panahona, ug nasuta ko nga ang Bethlehem...kung unsa ang kahulogan niini.

²⁹ Ug si Cristo mao ang atong Bethlehem, ug mapamatud-an nga ang matag tawo nga natawo diha sa Dios natawo usab diha sa Bethlehem, kay si Cristo mao ang Bethlehem. Ug ingon niana Siya, ang *Tinapay sa Kinabuhi*. Ug ang Beth, *B-e-t-h* nagpasabot—nagpasabot og “balay,” *E-l* nagpasabot og “Dios,” ug ang e-l-h-e-m ang *Elhem* nagpasabot og “tinapay,” maong nagpasabot kini og “Balay sa Tinapay sa Dios.” Ug si Jesus Cristo mao ang “Balay sa Tinapay sa Dios,” Tinapay sa Kinabuhing Walay Katapusan. Ug ang matag tawo nga natawo kang Cristo, natawo sa *Bethlehem*, “Balay sa Tinapay sa Dios.” Ug kung unsa nga ang mga kapunongan sa kasimbahanan karong panahona nagakampo usab, sama sa mga Filistehanon kaniadto, aron pugnan ang mga tawo nga makaduol Niini.

³⁰ Ug atua kadtong maisogon nga mga kalalakin-an, tungod nahibalo sila nga dinihogan si David ug mamahimong hari sa umalabot nga adlaw...bisan og dili siya tinamud kaniadto, kay usa ra siya ka latagaw sa taliwala sa iyang kaugalingong katawhan, apan miabot gayud ang adlaw sa iyang pagtawag. Naa sila’y kauban nga maisogon nga mga kalalakin-an. Ug timan-i nga, kadtong mga lalaki mao ang mga Gentil, halos tanan kanila mga Gentil, pagkatahum gayud nga tipo sa atong panahon karon. Ug isog kaayo ang usa ka lalaki, kay nakapatay siya’g walo ka gatus ka tawo gamit ang...gamit lang ang iyang bangkaw, siya ra, sulod sa usa ka adlaw. Ug ang usa pa ka lalaki nagtindog kaniadto sa usa ka umahan sa mga balatong, ug usa panon sa kasundalohan ang misulong, usa ka tropa. Ug mikalagiw silang tanan, apan siya nagtindog didto ug gipamatay ang maong mga kaaway hangtud nga nanghuyhoy na ang iyang mga bukton. Ug aduna pa’y usa, nga milukso ngadto sa usa ka lungag ug iyang gipatay ang usa ka leon

niadtong adlaw nga nag-ulan og niyebe, nga nag-inusara. Ug adunay usa ka Filis-...o usa ka Egiptohanon nga mihasmag kaniya, nga may taas nga bangkaw, ug mipunit ra siya og usa ka kahoy ug gibunalan kadtong bangkaw gikan sa kamot sa maong Egiptohanon, gikuha ang bangkaw ug iyang gipatay tong Egiptohanon, ug nakapatay pa siya og tulo ka gatus ka mga kapitan.

³¹ Ug gihatagan siya og maisog nga mga kalalakin-an! Ug misinggit si David, “Kon makainum unta ako sa makausa pa, kita n’yo, gikan nianang atabay!” (diin didto niya ginapainom kaniadto ang iyang mga karnero inig ipagawas niya sila matag buntag, gikan didto sa koral, manginom gyud dayon sila’g tubig) Ug gibunlot niining mga tawhana ang ilang mga espada ug nakigbugno batok sa mga kaaway sa gilay-on nga kinse ka milya, ug ilang gidala pabalik ang tubig alang kang David.

³² Ug miingon si David, “Idili kana kanako, nga moinom ko niini.” Ug iyang gibubo kini sa yuta ingon nga halad-nga-ilimnon ngadto sa Ginoo. Pagkaanindot gayud niini nga tipo sa mao rang butang, mahitungod niining Juan 3:16, karong gabhiona.

*...gihigugma pag-ayo sa Dios ang kalibutan, nga
Iyang gihatag ang bugtong niyang Anak,...*

³³ Ug unsa ma’y gibuhat ni Cristo? Ang Kinabuhi nga aduna Kaniya aron mabuhi sa Walay Katapusan, Iyang giula kadto ngadto sa yuta gikan sa Iyang mga ugat, sa Iyang natural nga kinabuhi, ngadto sa yuta ingon nga halad-sa-sala alang kanato. Ug tan-awa kining mga Gentil karong panahona, dungganon nga mga kalalakin-an, mga maisog, mga halangdong tawo, nga ginahulbot ang espada, ug nagabarug didto ug nakig-away paingon didto aron makakuha og lab-as nga tubig alang kang Cristo (ang atong David), nga wala kagustohi sa kadaghanan karon. Apan ang atong David, nga nasayod kita nga magahari Siya sa umalabot, Iyang pagatamakan ang matag nasud ilalum sa Iyang mga tiil sama niana, ug pagaharian sila pinaagi sa baras nga puthaw. Ug ang tinuod nga maisogon nga mga tawo, nga nagabarug sa Pulong sa Dios ug mga walay kahadlok nga ginapanigbas ang matag kilid, kay nasayod kita nga magahari gayud Siya.

³⁴ Atong basahon karon, human sa Juan 3:16; atong basahon ang pagduaw sa—sa mga Mago diha sa San Mateo, sa ika-2 nga kapitulo.

*Ug sa natawo si Jesus sa Betlehem sa Judea sa mga
adlaw ni Herodes nga hari, ania karon, miabot sa
Jerusalem mga mago gikan sa—gikan sa sidlakan,*

*Nagaingon, Diin man siya nga natawo nga Hari sa
mga Judio? kay hingkit-an namo ang iyang bitoon sa
sidlakan, ug mianhi kami sa pagsimba kaniya.*

Sa dihang si Herodes nga hari . . . nakadungog niini, siya nabalaka, ug ang tibuok Jerusalem uban kaniya.

Ug sa gipatigum niya . . . ang punoan sa mga sacerdote ug ang mga escriba sa lungsod, siya nangutana kanila kong hain matawo si Cristo.

Ug sila nag-ingon kaniya, Sa Bethlehem sa Judea: tungod kay mao kini ang gisulat sa propeta,

Ug ikaw Betlehem, sa yuta sa Juda, dili ikaw ang labing ubos sa mga principe sa Juda: . . . gikan kanimo moabot ang usa ka Magmamando, nga maoy magbalantay sa akong mga katawhan nga Israel.

. . . Si Herodes, sa gitawag niya sa tago ang mga mago, nagpakisayud kanila sa panahon nga sibo gayud sa pagpakita sa bitoon.

Ug siya nagsugo kanila sa Betlehem, nga miingon, Pangadto kamo ug susihon ninyo sa sibo gayud ang nahatungod sa bata; ug kong inyong hikit-an siya, balitaan ako ninyo, aron moadto usab ako sa pagsimba kaniya.

Ug sila . . . pagkadungog nila sa hari, nanlakat; ug, ania karon, ang bitoon, nga ilang hingkit-an sa sidlakan, nagauna kanila, hangtud miabut ug mihunong kini sa ibabaw diin nahimutang ang bata.

Ug sa pagkakita nila sa bitoon, nangalipay sila sa daku gayud nga kalipay.

Ug sa pagsulod nila sa balay, hingkit-an nila ang bata kauban ni Maria nga iyang inahan, ug sa pagpanaghapa nila, ilang gisimba siya: ug . . . giablihan nila ang ilang mga bahandi, ilang gihalaran siya sa mga gasa; bulawan, . . . inciense, ug mira.

Ug sa gipahamatngonan sila sa Dios pinaagi sa damgo nga dili mobiya . . . nga dili mobalik kang Herodes, namauli sila sa ilang yuta sa lain nga dalan.

³⁵ Katingalahan gayud kini dinhi nga ang Dios, diha sa mas ubos nga paagi, . . . ang Dios nagapakigsulti man sa mga tawo pinaagi sa mga damgo. Nagatop ako niini. Apan niining higayona migamit ang Dios og ikaduhang paagi.

³⁶ Karon, ang damgo . . . ang damgo, kung kini hubaron sa hustong paagi, pareho ra kini sa usa ka panan-awon; basta ang damgo mahatagan lang og paghubad. Gigamit na kini sa Dios sukad pa sa Daang Tugon ug sa tanang mga kapanahonan, ug nagsaad nga gamiton kini pag-usab sa kaulahiing mga adlaw. Karon, usahay ang mga tawo kung masobraan og kaon ug—ug uban pa urumon sila, ug kana dili—kana dili gayud tinuod, nga espirituwal nga mga damgo, kay dili gyud kini motakdo kung imong—kung imong susihon kini. Ug bisan pa og mora'g ensakto

ang uban, apan aduna gayu'y tinuod, nga mga espirituwal nga damgo. Ug nasayod kita dinhi sa tabernakulo nga ang Dios nagahatag og mga damgo sa mga tawo ug gina-interpretar sila, ug dayon nagakahitabo kini, ug tinuod gyud sila. Apan kini usa lamang ka ikaduhang paagi sa pagbuhat niini. Kita n'yo?

³⁷ Karon, ang hinungdan nga ingon niadto ang nahimong pamaagi, kay tungod walay propeta sa yuta niadtong panahona, nga mao unta'y mohubad sa damgo. Kita n'yo? Walay propeta nga mao'y mohubad sa mga damgo, sama kang Joseph ug—ug kang Daniel ug kadtong mga propeta sa karaang panahon. Wala sila'y propeta sulod sa upat ka gatus ka tuig, ug migamit ang Dios og damgo...alang sa kaayohan sa Iyang Kaugalingong Anak. Gibuhat gyud Niya kini.

³⁸ Gisultihan Niya si Jose, sanglit usa siya ka “tawo nga matarung, ug dili siya buot magapakaulaw kaniya naghunahuna pagbiya kaniya sa tago.” Sigurado nga gisultihan na siya ni Maria mahitungod sa pagduaw ni Gabriel ug uban pa, ug kung unsay gisulti sa maong manulonda; apan niadtong nakita na niya nga nagmabdos na gayud si Maria, kana'y—kana'y talagsaon gyud kaayo. Kabalo mo, grabe gyud kadto...butang kadto nga lahi gyud kaayo. Ug kabalo mo, mao kana'y nagakahitabo karong panahona. Nagabuhat ang Dios og mga butang nga talagsaon, ug tungod sa pagkatalagsaon niini, dili kini masabtan bisan sa matarung nga tawo.

³⁹ Dili gyud kadto masabtan ni Jose, tungod sa pagkatalagsaon niadto. Usa siya ka maayong tawo, walay unsa man nga sayup kaniya. Usa siya ka maayong tawo, usa ka matarung nga tawo, apan sobra gyud kadto ka talagsaon. Kita n'yo, si Jose siguro mga kapin kuwarenta o kuwarenta'y singko anyos na, o mga ingon niana, mao'y ingon nila, niadtong minyoonon na sila ni Maria. Apan dinhi atong makita ang usa ka butang nga wala pa sukad mahitabo: usa ka babaye nga minyoonon pa lang sa maong lalaki, apan nasuta nga nagmabdos na! Ug tungod kay talagsaon kaayo kadto si Jose nakahunahuna nga biyaan na lang niya sa hilum si Maria. Apan dihadiha mismo niadtong makuyaw nga takna, gipadala sa Dios ang Iyang Manulonda, ug nagpakita kaniya sa damgo ug miingon, “Ayaw kahadlok sa pagpangasawa kang Maria, kay Kanang gipanamkon niya iya sa Espiritu Santo.”

⁴⁰ Pagkadaku sa bag-ong pagtoo nga nabatonan ni Jose niadtong mibangon siya gikan didto! Kita n'yo, wala na siya nagkinahanglan pa og unsa man nga paghubad, kay ang damgo wala man sa simbolo. Diretsahan kadto, “Ayaw kahadlok sa pagpangasawa kang Maria, kay Kanang gipanamkon niya iya sa Espiritu Santo.” Walay propeta niadtong panahona nga makahatag og hubad, busa kinahanglan nga direkta ang mensahe, direkta gayud nga sama niana; sa Dios...gikan sa

Dios ngadto kang Jose. Karon . . . ug gigamit sa Dios ang maong ikaduhang pamaagi.

⁴¹ Unsa ma'y ginatudlo niini kanato dinhi, sa dili pa kita moadto sa atong teksto? Ania ang gitudlo niini kanato: nga mahimong gamiton sa Dios ang tanang bahin sa atong pagkatawo kung ato kining isali- . . . itugyan ngadto Kaniya. Mahimo Niyang gamiton ang atong hunahuna, ang atong mga damgo, ang atong ilalum-nga-panimuot, ang atong unang panimuot, ang atong mga dila, ang atong mga kanta, ang atong mga mata, ang atong . . . Ang tanan nga anaa kanato mahimong magamit sa Dios kung kini nahitugyan ngadto Kaniya. Kita n'yo? Ang tanan-tanan kung unsa ka, itugyan lang kini sa Dios. Gamiton gayud Niya ang tanang agianan ug ang tanang bahin nimo, Iya kining gamiton. Bisan unsa pa kini, gamiton Niya kini kung kini gibalaan ngadto sa Iyang katuyoan ug pagtawag.

⁴² Karon, niining gabhiona pagahisgotan nato ang mahitungod sa: *Mga Gasa*. Ug buot kong hatagan kini og ulohan, kung . . . ako kining gisulat, naa ko'y nasulat dinhi, samtang nagabarug ganina si Igsoong Neville: *Ang Mga Gasa Sa Dios Kanunay'ng Nagatultol . . . Ang Mga Gasa Sa Dios Kanunay'ng Nagatultol Sa Ilang Mga Dapit*. Ang mga gasa sa Dios kanunay'ng ginasalikway, apan kini makakaplag gayud sa iyahang dapit sa dihang . . .

⁴³ Karon, tan-awa kadtong gasa nga gipalit niadtong mga mago . . . o giregalo ngadto Kaniya. Karon makita nato nga gabayloanay na lang kita og mga regalo. Kinahanglan gyud nga ang matag usa aduna kono'y madawat nga regalo, ug gusto niyang hibaloon kung unsa ang ihatag kaniya sa sunod nga tawo, aron makahatag pud siya kaniya nga parehas lang og kantidad. Ug kung dili man, bueno, inig Bag-ong Tuig, ang tan-aw niya nga kinahanglan niyang mobawi. Ug ang matag usa nagahunahuna, nagakabalaka, ug daw dili mahimutang, maski ang mga milyonaryo, kung unsaon nila pagbawi. Sobra-sobra ilang ginahatag *niining* usa ug *nianang* usa pud, sa dihang kini—kini sayup kaayo. Kini—kini'y—kini'y—kini'y dili gyud unta angay . . . ang Pasko unta . . .

⁴⁴ Ania: usa ra gyud ka gasa ang imong mahimong idalit, ug kana mao ang imong kaugalingon. Itugyan ang imong kaugalingon ngadto sa Dios tungod kay gihatag na sa Dios kanimong Iyang Gasa. Karon, adunay usa lamang ka butang nga wala pa nimo mahatag sa Dios, kana mao ang imong kaugalingon ngadto Kaniya.

⁴⁵ Karon, ug sa daghang mga higayon, adunay mga *ngalan* sa Biblia. Pero wala na nato kana tagda, karong panahona. Kita . . . Kanunay ninyong madungog nga ginasaway ko kini nga ngalana, sa mga bata nga gitawag og . . . o mga tawo nga ginganhan ang ilang mga anak nga “Ricky.” Karon, ang *Ricky* usa gayud ka

maut nga ngalan! Kita n'yo? Ug usa kini ka...dili mo sila angay pangalanan og ingon niana. Kung adunay kamo'y anak nga ginganlan og Ricky, palihug lang alang sa kaayohan, ilisi kana og laing ngalan. *Ricky*, o—o *Elvis*, o mora'g ingon niana... Ang *Ricky* nagpasabot og “usa ka ilaga.” Kita n'yo? Ug busa kung ikaw—ikaw magsige'g... Ug—ug kung unsa ang itawag nimo sa usa ka tawo, magbilin kana og usa ka marka. Dihay usa ka gamay'ng babaye, niadtong miaging adlaw, aduna siya'y anak nga lalaki didto nga gitawag og “Ricky” ug ang ngalan sa bata kay Ricky, James Ricky. Ug tungod kay popular kaayo ang (Ricky), maong gitawag nila siya og “Ricky.” Miingon ko, “Usba kanang ngalana!”

⁴⁶ Nabantayan nako nga may pipila dinhi nga naglingkod karon nga adunay apo nga lalaki, ug ang ngalan sa bata kay... kanang usa—usa ka gamay nga bata malumo ug makalingaw kaayo; apan ang usa kay ginganlan man og Ricky, ug ingon-ana na gyud hinoon siya. Tan-awa lang ninyo siya, ang iyang kinaiya pareho gyud sa iyang ngalan. Ug siya... giingnan nako ang uban sa iyang mga apohan, o kinsa ba to, ingon ko, “Sultihi ang inahan nga usbon ang ngalan anang bataa, ilisi lang kanang ngalana ug tan-awa kung unsa'y mahitabo sa bata.” Kita n'yo, kamo mga tawo ayaw n'yong motoo niana. Abi nato nga kinaraan ra kaayo kana para niining panahona.

⁴⁷ Kung wala pa'y kalabotan ang ngalan, nan nganong hangtud nga *Jacob* pa ang tawag kang Jacob, nga nagkahulogan og “mangingilog, maglilimbong,” ingon-ana pud siya? Apan sa diha nga nakigbugno siya sa Ginoo tibuok gabii, ug gibag-o sa Ginoo ang iyang ngalan, ug mga... sa dihang mga saisenta anyos siya kaniadto ang panuigon. Giusab sa Dios ang iyang ngalan gikan—gikan—gikan sa Jacob ngadto sa *Israel*, “usa ka prinsipe sa atubangan sa Dios,” ug nahimo gyud siyang ingon niadto.

Nganong si Abram gitawag nga...kinahanglan pang tawgon og “Abraham” una pa matawo ang bata? Nganong gitawag man ni Sarai og “Sarah” una pa matawo ang bata?

Nganong si Pablo...o gitawag...Saulo pa ang iyang karaang ngalan, apan niadtong iya nang nahinagbo si Jesus, giusab Niya siya gikan sa Saulo nahimo nang “Pablo.”

Sa dihang gibag-o usab ang ngalan ni Simon nga gikan sa Simon nahimo nang *Pedro*, nga nagkahulogan og “gamay'ng bato.” Ug—ug gipang-usab ang ilang mga ngalan, tungod kay ang imong ngalan adunay kalabotan sa imong pagkatawo. Sa dihang imong ipamulong ang usa ka butang, ipadayag niini mismo kung unsa kini. Dili lang úsa ko mosulod niining bahina karon, kay mao kana ang atong hisgotan sa umaabot nga Domingo sa gabii, kita n'yo, ang pagpaila sa pulong. Ug, apan karon, makita nato nga kining mga butanga tinuod gayud.

48 Karon matikdi, ang Dios . . . Pagkatalagsaon gayud kini nga butang karong gabhiona, ang makita nato nga kadtong mga kalalakin-an, kadtong mga Mago, manggialamon nga mga tawo, mga halangdon nga mga tawo . . . nga mga gikan pa sa Sidlakan, didto sa Babilonia, didto sa India. Ug wala sila moabot lang og kalit nianang gabhiona, nga nanagsugod og lakaw usa ka gabii ug niabot dayon pagkasunod gabii, kondili mga halos duha ka tuig sila mibiyahé úna pa niabot didto. Ngani wala nila naabtan ang gamay'ng Masuso diha sa usa ka pasungan. Usa na ka Bata ang ilang naabtan, usa na gyud ka Bata. Ug gipamatay ni Herodes ang mga bata gikan sa duha ka tuig ang panuigon paubos. Kita n'yo, nahibaloan nato nga dili na usa ka masuso ang nagahigda didto sa duyan, kay kung ingon niadto pa mga masuso ra unta ang iyang gipamatay. Apan iyang gipamatay ang mga batang gagmay, aron masiguro niya nga maapil gyud si Jesus, basta nag-edad og duha ka tuig paubos. Gibanabana niya ang pangidaron kay dili man pud niya gustong mopatay og daghan kaayo, tanan gayud nga mga bata, iya rang . . . kay magamit pa man niya sila ingon nga iyang mga ulipon. Gusto niyang . . . masigurado nga mapatay si Jesus, mao nga ang ingon niya, "Tingali mga duha ka tuig na ang panuigon nianang Bataa. Busa, tanang bata nga duha ka tuig paubos, patya kini." Kita n'yo?

Ug mao kana ang katumanan sa gisulti sa propeta, nga "Didto—didto sa Rama adunay nadungog nga usa—usa ka pagtiyabaw o paghilak, pagdanguyngoy; nga si Raquel nagahilak alang sa iyang mga anak, kay sila wala na man."

49 Karon, namatikdan ba ninyo nga kining mga mago, bantugan nga mga tawo, atua sila didto sa Babilonia ug nakita nila ang Iyang Bitoon, kung sa ato pa, "Nakita namo ang Iyang Bitoon sa sidlakan ug miari kami aron sa pagsimba Kaniya." Gikan sila sa sidlakan, kon diin nakita nila ang Bitoon, nga mipaingon sa kasadpan. Tungod kay ang India anaa man sa kasadpan, sa amihanang-kasadpan sa Bab- . . . sa—sa Palestina. Ug gisubay nila ang Suba sa Tigris ug mitabok sa mga kapatagan hangtud miabot mismo didto, padulong sa Bethlehem kon diin nakita nila ang—ang—ang Bata. Ug hinumdumi nga wala gayud mibiya si Jose ug ang iyang pamilya sa maong lugar; miadto ra sila sa Nazaret ug didto nila gipadaku ang Bata, didto mismo.

50 Karon, makita nato dinhi nga ilang gidalit . . . Kining mga lalaki, ingon nga mga astronomo ug tigtuon sa mga bitoon, ug sa ilang pagkakita niadtong misteryoso nga kahayag sa langit nga mitungha didto sa itaas, nga aduna gyu'y butang nga nagakahitabo; nasayod sila nga kana mao na ang Mesias, ang—ang Magmamando sa mga langit ug sa yuta, nga kinahanglan nang ipanganak. Ug nangadto sila, sa pagkahibalo nga ang Dios maporma, mopuyo sulod sa usa—usa ka tawo; aron ilang maipakita nga ilang pagpamatuod . . . Kabalo mo, kabalo mo,

ang inyong kinabuhi nagasulti og mas kusog pa kay sa inyong mga pulong, nga bisan unsa pa'y inyong isulti, ang mga tawo nakaila na kung unsa gyud kamo pinaagi—pinaagi sa inyong pagkinabuhi.

⁵¹ Ug bantayi kadtong mga tawhana, kadtong mga Mago, ilang gidala Kaniya . . . Tan-awa ang mga gasa nga ilang gidala Kaniya, kay nagpaila kadto kung unsa ang ilang pag-ila kung kinsa Siya. Gidalit nila Kaniya ang bulawan, incienso, ug mirra. Ug karon tan-awa ninyo kung unsa kini nga mga simbolo, nga gusto nakong hisgotan kaninyo karon . . . kung unsay pasabot niini nga mga simbolo. Karon, aduna ko'y pipila ka Kasulatan nga naisulat dinhi mahitungod niini nga atong basahon sa makadiyut, kon itugot sa Ginoo.

Karon: bulawan, ug incienso, ug mirra.

⁵² Karon: ang bulawan sa Biblia . . . grabe kini ka tukma kang Cristo, tungod kay ang bulawan nagrepresentar sa pagka-Dios. Ang *bulawan* nagrepresentar sa “pagka-Dios.” Hisgotan ra nato kini taudtaod. Ang *incienso* nagrepresentar sa “pagpangalagad.” Ug ang *mirra* nagrepresentar sa “kamatayon.” *Ang Dios, pagka-Dios, diha sa pagpangalagad aron mamatay.* Ug mao kana Siya. Ang mismong butang nga ilang gidala nagpadayag kung unsa ang ilang pag-ila kung Kinsa Siya.

⁵³ Ug mao usab kana ang akong isulti para kanato karon, “Ang mga butang nga atong ginadala ngadto Kaniya nagapaila ra kung unsa ang atong pag-ila bahin Kaniya.” Nasabtan n'yo ba ang buot kong ipasabot? Kita n'yo? Kung usa kamo ka . . . Kung ginatoohan mo Kini sa tibuok mong kasingkasing, ang matag Pulong niana, mapaila mo kini pinaagi sa paghatag ngadto Niini sa tanan-tanan nga anaa kanimo. Kita n'yo? Apan kung ang pagtoo mo nga kini usa lang ka maayong dapit aron makapakig-uban sa mga maayong mga tawo, sulod sa simbahan ug mga butang nga sama niana, mao ra pud kana ang imong ihatag (pipila lang ka oras nga pakig-uban sa kongregasyon o unsa man). Apan kung kamo—kung nagatoo gayud kamo Niini sa tibuok ninyong kasingkasing, nan ihatag gyud ninyo ang tanan-tanan nga anaa kaninyo para Niini. Kita n'yo? Ug ginapaila kamo niini, nga tinuod gayud nga nagatoo kamo sa Mensahe, nga nagatoo nga kini mao gayud ang Kamatuoran.

⁵⁴ Daghan kaayo ang nagaingon, “Makatoo ko *niini* kutob ra niini. Hangtud ra *niini* ang akong matoohan.” Ang mga tinunan . . . Sa pagkahinumdom ko niadtong miaging higayon nga ania ko dinhi, naghigot ako bahin niana: *Mga Magtotoo, Mga Nagapatoos, Ug Mga Dili-Magtotoo.* Dili ba? Ako . . . dili ba nakahigot na ko niana dinhi? Kita n'yo? Ug ang matag tawo, bantayi kung unsa ang ilang katagorya. Kita n'yo, moabot gyud sa punto nga kutob ra sila diha sa ilang kasarang dawaton, unya dili na nila madawat ang uban pa.

⁵⁵ Karon, pagkasibo gayud niadtong mga gasa sa panaw ni Cristo dinhi sa yuta, isip usa ka Bata nga natawo dinhi sa kalibutan. Ug kadtong mga gasa nga gidala sa mga mago ngadto Kaniya, sibo gayud sa Iyang sugo gikan sa Dios ug sa Iyang panaw dinhi sa kalibutan.

⁵⁶ Karon, ang unang butang: ang Dios. Ang Dios kadto, si Jesus mao ang Dios nga anaa sa pormang tawo. Maglisud gayud og dawat ang mga tawo niana, bisan hangtud karon, nga “Siya ang Dios.” Ug Siya. . . Mao gyud kana kung unsa Siya. Siya’y dili ubos sa Dios. Siya mao ang Dios mismo nga nadayag diha sa unod. Siya mao ang Magbubuhath nga anaa sa sulod sa Iyang Kaugalingong binuhath. Karon nga. . . Siya mao ang Magbubuhath nga anaa sa sulod sa Iyang binuhath, pinaagi sa paglalang, alang sa mga binuhath. Siya mao ang Magbubuhath nga anaa sa sulod sa Iyang binuhath, pinaagi sa Iyang pagbuhath, ug alang sa Iyang mga binuhath. Ang tanan nagabalik gayud ngadto sa Dios, ang tanang butang. Dili ba ninyo makita? Kahupnganan sa Dios! Siya mao ang Magbubuhath ingon nga Siya mao man ang Dios. Ug Siya usa ka Binuhath dinhi sa yuta (usa ka Binuhath nga napailalum sa panahon), nga nagpasabot nga Siya’y siguradong adunay sinugdanan, busa gibuhath Niya ang usa ka lawas alang sa Iyang Kaugalingon aron Iyang pagapuy-an. Ang Dios, Mismo, nagbuhath og usa ka lawas alang sa Iyang Kaugalingon. Kita n’yo? Aron pinaagi sa maong binuhath, Iyang maluwas ang mga nangalaglag nga binuhath nga Iyang mismong gibuhath.

⁵⁷ Walay bisan unsa nga bug-os mapapas sa tawo, wala gyu’y ni usa. Wala ka’y mahimo og bisan unsa aron hingpit nga mapapas ang bisan unsang butang. Puede kang mokuha og usa ka papel ug sunogon kini, puede nimong sunogon ang usa ka bilding, puede nimong sunogon ang usa ka kahoy; apan dili gihapon nimo kana bug-os nga mapapas. Ikaw. . . ang kainit nga anaa dinha, ang kalayo nga nagapangbungkag, kemikal ra kana nga nagabuto. Nagabalik ra sila sa kung unsa kini sila sa sinugdanan. Wala gyud sila ingon nga napuo. Kung imong sunogon ang usa ka kahoy (ug ang kalibutan, pananglitan, kung nabuhi kita sa Walay Katapusan sama sa Dios, ug kanang mga kemikal nga gikan sa maong kahoy ug kanang kalayo mibalik sa ilang orihinal nga sinugdanan ug kini. . . kung unsa man kini, ang pagkabulag-bulag sa mga atom ug uban pa, ug ang—ang kalibutan, pananglitan, makapadayon pa sulod sa minilyon ka tuig), mahimo gyud kining mobalik ug mahimong kahoy pag-usab, sama gyud sa kung unsa kini sa sinugdan.

⁵⁸ Dili gyud nimo bug-os nga mapapas ang bisan unsang butang kay kini Gilitok nga Pulong sa Dios. Amen! Oh, ug kana nakapabati kanako og pagkarelihiyoso, karon. Kita n’yo? Kung unsa ma’y gisulti sa Dios, magpabilin gyud Kana hangtud sa kahangturan. Amen! Kita n’yo, dili gyud ka makapaspas. Kabahin kita niining kalibutana, ug dili gayud kita bug-os nga

mapuo. Dili, sir. Ang sala (ang kalag) pagapapason, nasayod ta niana. Apan ang—ang lawas nga atong ginapuy-an, dili gayud mapapas. Kita n'yo?

⁵⁹ Karon, busa, ang Dios nagbuhat og lawas alang sa Iyang Kaugalingon. Siya mao ang Magbubuhath, ug gibuhath Niya ang Iyang Kaugalingong binuhath, aron pinaagi niini nga Binuhath maluwas Niya sila nga nangalaglag diha sa Iyang binuhath (kana'y ikaw ug ako, mga binuhath nga napailalum sa panahon).

⁶⁰ Ang Iyang—Iyang Pulong eksaktong nagpakita nga . . . Siya ug ang Iyang mga buhat nagpamatuod nga Siya walay lain kondili mao mismo ang Magbubuhath. Mikuha Siya og usa ka buok nga tinapay ug gipikas kini, ug nagpadayon Siya sa pagpikas-pikas niadtong usa ra ka buok nga tinapay, ug gipakaon ang lima ka libo ka tawo; ug aduna pa'y nahipos nga pito ka bukag nga puno sa mga nahibilin, ug ang tanang atua didto nabusog gayud sa—sa—sa maong tinapay.

⁶¹ Mikuha Siya og isda ug giputol-putol kadto. Karon kung atong hunahunaon Siya ang nagbuhat niadtong isda sa sinugdan. Siya pud ang nagbuhat niadtong tinapay sa sinugdan. Apan gikuha Niya kadto isda ug giputo-putol kadto. Usa kini ka buhi nga isda kaniadto, ug dayon gion-on o—o kaha giprito; ug sa matag higayon nga Iyang putlon kini, unsa man kini (gion-on man o giprito), motubo kini pag-usab (niadtong mismong taknaa nga giputol Niya kini) nga usa na usab ka inon-on o pinirito nga isda. Dili ba pagkaanindot niana? Nagapakita kana nga Siya walay lain kundi si Jehovah mismo. Ug busa Siya mao gayud ang Magbubuhath nga makagamit sa Iyahang Kaugalingong binuhath, ug pinaagi sa Iyang binuhath, maipahayag Niya kung Kinsa Siya. Alleluyah! Nagpamatuod kini nga Siya mao gayud kung unsa Siya. Siya'y Dios. Busa, ang bulawan angay lang gayud para Kaniya, isip halad sa Iyang pagkahimugso. Kay Siya'y Dios nga nahimong unod.

⁶² Tingali'g duna ko'y masulti nga pipila- . . . wala man siguro'y mga estranghero sa atong taliwala karong gabhiona, sa akong tan-aw, busa . . . niining atong panagtigum sa pag-ampo. Apan tugoti ko nga isulti kini nga butang. Si Jesus ba, sa dihang ania pa Siya, . . . ? Karon, kini para sa pagpamalandong, dili aron usisahon, o sukut-sukiton diay. Bantayi ninyo, aron sa pagpamalandong, miingon si Jesus, sa San Juan 14:12, "Siya nga nagatoo Kanako, ang mga buhat nga Akong ginabuhath pagabuhaton usab niya ug labaw pa niini ang iyang pagabuhaton, kay Ako moadto sa Akong Amahan." Namatikdan ba ninyo kana? Himatikdi, karon, ang Anak kadto sa Dios nga nagasaad sa magtotoo, mahitungod nianang mas labaw pang mga butang kay sa Iyang gibuhath, (niining katapusang mga adlaw) nga pagabuhaton sa magtotoo ang labaw pa nga mga butang kay sa Iyang gibuhath. San Juan, ika-14 nga kapitulo, ika-

12 nga bersekulo. Husto ba kana? Motoo ba kamo nga gisulti kana ni Jesus?

⁶³ Himatikdi, sa dihang naghimo'g tinapay si Jesus kaniadto; mikuha Siya og usa ka buok nga tinapay, ug naghimo'g dugang pa nga tinapay gikan sa daan nang tinapay. Sa dihang naghimo Siya og isda; mikuha Siya og isda nga daan nang gibuhat nga isda, ug naghimo'g usa pa ka isda gikan niini. Husto ba kana? Mikuha Siya og tubig, nga sa potensyal mamahimong bino, ug naghimo og bino gikan niana. Husto ba kana? Apan nakita nato Siya sa atong taliwala, niining katapusang mga adlaw, nga naghimo'g mga butang gikan gayud sa wala, nga bisan walay bisan unsa nga daan nang minugna! Husto ba kana? Naghimo Siya og squirrel bisan walay squirrel nga gigikanan. Tinuod gayud! Oh, Siya'y . . . nagapabilin nga Dios. Siya'y nagpabiling Dios karon ingon sa kung Unsa Siya kaniadto ug sa kaniadto pa gyud, ug hangtud sa kahangturan. Siya'y nagpabiling Dios, ug nagaawhag sa mga kasingkasing nga toohan kini, "Mas labaw pa nga mga butang kay sa niini, inyong . . . bisan walay butang nga hawiran o pikaspikason. Isulti lang kini, ug kini motungha gayud."

⁶⁴ Himatikdi karon, atong makita nga ang Iyang . . . Nagpaila Siya. Ang mga buhat nga Iyang gihimo nagpaila Kaniya nga Siya ang Dios, nagpakita nga Siya mao gayud. Kay miingon Siya, "Kung wala Ko ginabuhat ang mga buhat sa Akong Amahan, nan ayaw Ako toohi."

⁶⁵ Ug dili ba angay ra pud isulti sa Cristohanon karon, "Kung wala ko ginabuhat ang mga buhat sa akong Manluluwas, ayaw ninyo ako toohi"? Kita n'yo?

⁶⁶ "Ingon nga ang Amahan mipadala Kanako, ginapadala Ko usab kamo." Ug kung ginabuhat ninyo ang maong mga buhat, mga buhat sa paglalang sa Amahan nga nagpadala Kaniya, nan kini usa ka paglalang . . . Ang Cristo (ang Magbubuhat) nga nagpadala kanato, nagapamuhat sa mga buhat nga iya ni Cristo nga Magbubuhat. Kita n'yo? "Ingon nga ang Amahan mipadala Kanako, ginapadala Ko usab kamo. Ug kung wala Ko ginabuhat ang mga buhat sa Akong Amahan, ayaw ninyo ako toohi."

⁶⁷ Kung ingon-ana siguradong ikinabuhi gayud sa Cristohanon karon ang Kinabuhi nga gikinabuhi ni Cristo kaniadto, kondili adunay kita'y katungod nga moingon, "Dili kana tinuod."

⁶⁸ Himatikdi karon, ang Iyang mga buhat mao ang naghimo Kaniya nga . . . o nagpaila Kaniya nga mao ang Magbubuhat. Ang Iyang mga buhat nga Iyang gibuhat maoy nagpurongpurong sa testimonyo sa Iyang kinabuhi, nga Siya mao ang "Magbubuhat"; wala na'y ikalimud pa niini. Busa, sa dihang ilang gitanyag ang gasa nga bulawan, sila'y hingpit gayud nga nagkatakdo sa Dios tungod sa ilang gasa. Gitanyag nila Kaniya ang bulawan, nga mao'y nagpaila Kaniya ingon nga Dios.

Kanunay kining usa sa korona, bulawan nga korona . . . sama sa puno ng bulawan nga ulo, ni Haring Nabucodonosor. Sa tanan gyud, nakita n'yo, kini . . . kanunay gyud nga nagrepresentar ang bulawan sa pagka-Dios.

⁶⁹ Karon: ang *incienso*. Gusto natong dalion kini. Ang *incienso* mao ang “halad pagpangalagad kang Jehova.” Karon, kung gusto ninyong isulat kini nga mga Kasulatan, Levitico 2:2, ug Levitico 16:6 hangtud 15. Hingsayran nato nga mao kana ang pagka-sacerdote, ang paghimo og usa ka halad ngadto kang Jehovah. Sa dihang maghalad ang saserdote, kinahanglan nga ihalad kini nga sinagulan og incienso isip halad-tungod-sa-sala, aduna pa sila'y ibutang og nagkalainlaing mga sambog og isagol kini. Bisan pa sa halad-nga-harina, sa tinabyog nga halad, gisagulan kini og incienso. Tungod, makapahimuot kini kang Jehovah kung kini pinahiran og *incienso*, nga nagpasabot nga “pagpangalagad kang Jehova, nga Dios.” Ug, karon, hingsayran nato nga Siya'y Dios. Ug ang pagdalit nila Kaniya og incienso, usa ka tipo nga Siya'y usa ka pag-alagad kang Jehovah. Si Jesus Alagad man ni Jehovah.

⁷⁰ Karon, diha sa San Mateo 12:15 hangtud 21, atong makita nga Siya'y Alagad ni Jehovah, “Tan-awa ang akong Alagad, Kang kinsa Ako nahimuot pag-ayo” (ug Siya mao gayud) “ug ibubo Ko ang Akong gahum diha Kaniya.” Busa ang Iyang kinabuhi dinihogan og incienso, alang sa pag-alagad kang Jehovah. Pagkaanindot sa gasa nga gitanyag niadtong mga mago! Kita n'yo, butang kadto nga . . . ang—ang gasa nga ilang gihatag, mao'y butang nga nagpaila kang Jesus ingon nga Alagad ni Jehovah.

⁷¹ Karon kung mahimo lang unta nato kana, ang mapaila ang atong kinabuhi. Kita n'yo, ang atong mga kinabuhi nga maila ingon nga alagad ni Jehovah. Mao kana ang katuyoan sa incienso, nga mao ang nagpahimo Kaniya nga Alagad ni Jehovah.

⁷² Karon, ang *mirra*, m-i-r-r-a, mao kini ang “ginapahid tungod sa kamatayon.” Atong makita sa San Juan, sa ika-19 nga kapitulo, sa ika-39 nga bersekulo, nga didto sa—sa panerbisyo sa paglubong ni Jesus, sa dihang miadto sila Maria ug uban pa, nagdala sila og mirra aron ipahid Kaniya; kay kinahanglan Siya nga mahimong Alagad sa kamatayon para kang Jehovah. Kita n'yo? Kinahanglan nga adunay mamatay. Usa kadto ka buluhaton nga gikinahanglan buhaton alang sa Dios, ug walay si bisan kinsa ang takus sa pagbuhat niini gawas sa Dios Mismo. Busa, ang pagdala nila og mirra—mirra, nga tungod sa pagka-Dios, ug tungod sa pag-alagad, Siya usab gipahiran sa mirra; nga kini nga Dios kinahanglan mamatay aron luwason ang dili hingpit. Oh, pagkamaanindot nga butang!

⁷³ Nalaglag na ang tibuok kabuhatan. Nahisgotan na nato

kini diha sa Pito ka mga Selyo. Kita n'yo, nalaglag ang tibuok kabuhatan, napukan ang tanan-tanan. Gipanag-iyang na kining tanan ni Satanas. Siya ang nahimong manununod niini ug iya gihapon kini karon. Tinuod gyud kana. Mao kana ang hinungdan nga kita adunay pagpakig-away ug nakasinati niining tanang kagubot. Gikontrolar niya ang tanang gingharian; si Satanas gayud. Ang matag gobyerno, ang matag hari, ang matag gingharian, kontrolado ni Satanas. Ang tibuok kalibutan kontrolado ug gimandoan ni Satanas. Mao kana'y hinungdan nga aduna kita niining tanang kagubot nga atong nasinati karon. Ang si kinsa man nga magtutuoan sa Biblia, o unsa man, makasulti kaninyo nga si Satanas. . . Bueno, Mismo ang Biblia nagaingon nga kontrolado niya, kita n'yo, nga siya ang nagakontrol sa kalibutan. Apan si Cristo mao gyud ang mahimong Manununod niini, tungod kay Siya karon ang atong Manunubos. Ug mianhi Siya aron tubuson ang tibuok kabuhatan, ug wala na'y lain nga makabuhat niini gawas sa Dios Mismo.

⁷⁴ Mao kana'y hinungdan nga ang Dios wala'y bisan unsa man nga buhaton gawas sa paggamit sa tawo. Kanunay Siyang nagapamuhat pinaagi sa tawo tungod kay kinahanglan Siyang mogamit og usa ka tawo. Ang tawo mao ang kinahanglan Niyang gamiton aron ipadayag ang Iyang kinaiya isip usa ka Manluluwas. Kinahanglan Niyang himoon ang tawo sumala sa Iyang dagway, himoon siya nga susama Kaniya, ug hatagan siya'g kagawasan sa pagpili sa iyang kaugalingon ug tugotan siyang buhaton ang bisan unsa nga gusto niyang buhaton. Mahimo niya ang pagpili. Ug nasayod Siya nga ang tawo, sa paghatag Niya kaniya niining kagawasan sa pagpili, mahulog gayud. Busa ingon nga kinahanglan man Niyang buhaton kana, miliso Siya ug gihimo ang tawo nga katambayayong Niya, ug walay ginabuhat og bisan unsa gawas kung kini pagabuhaton Niya pinaagi sa tawo!

⁷⁵ Ang tibuok buluhaton sa pagtubos nagaabot pinaagi sa usa ka tawo! Alleluyah! Ang kamatayon miabot pinaagi sa unang tawo, apan ang Kinabuhi miabot usab pinaagi sa ikaduhang Adan. Kita n'yo? Mao kana, wala Siya'y ginabuhat og bisan unsa tungod kay kinahanglan Niyang mogamit og usa ka tawo para niana, ug busa nagagamit usab Siya og tawo aron tubuson kini pag-usab. Busa ang Dios nahimong si Jehovah, o, si Jehovah na- . . . Siya ang Dios, ug nahimo Siyang usa—usa ka Anak. Nahimo Siyang porma sa sala, aron matubos Niya ang makasasala. Kita n'yo, mao kana ang kinatibuk-an niini.

⁷⁶ Karon, tan-awa ninyo kung unsay . . . kung unsa kaanindot nga ang maong mga gasa haum gayud kang Jesus Cristo; kita n'yo, ang bulawan, nga nagasimbolo sa Iyang pagka-Dios. Karon, kadtong mga mago dili sila mga pagano. Mga dinihogan sila sa Dios. Wala sila nagatumo-tumo lang. Kana

mismo ang nagpamatuod, nga bisan ang Mago, nakita gayud nila ang Supernatural. Tungod kay ang ila mismong mga gasa, nga ilang gitanyag, mao'y nagpaila ug nagpamatuod sa ilang testimonyo nga nakita gyud nila ang Supernatural nga Kahayag. Tungod kay ngano man? Hingpit gyud kini nga nagahisgot. Nagdala sila og *bulawan*, “pagka-Dios.” Nagdala sila og *inciense*, “pag-alagad.” Ug nagdala pud sila’g *mirra*, para sa Iyang “kamatayon,” bisan og Bata pa Siya niadtong higayona, amen, nga nagapakita nga ang Dios pagapatyon diha sa unod, amen, aron matubos ang nahulog nga tawo. Unsaon man pagbalibad niana sa mga tawo?

⁷⁷ Kung maamgo lang ninyo: Unsa ba’y atong gibuhath dinhi? Asa ba kita gikan? O unsa ba’y katuyoan nato dinhi? Wala man kita ibutang dinhi nga aksidente lang, kondili gibutang kita dinhi alang sa usa ka katuyoan, ug kinahanglan natong tumanon kana nga katuyoan. Apan sa gihapon mobalik kita sa maong basihan nga aduna kita’y kagawasan sa pagpili kon diin mahimo natong tumanon Kini o isalikway Kini, sama sa gibuhath ni Adan sa sinugdanan.

⁷⁸ Ginatan-aw ko, kining gagmay’ng mga batan-ong babaye dinhi, Igsoong... Unsa’y...? Mora’g mao kining gamay’ng gining nga nagatugtog sa piano, ug akong—gipaminaw ko gayud sila samtang nagaawit. Sila ang among gihisgotan, samtang paingon pa kami dinhi. Kana ang usa ka gamay’ng pamilya nga gipahanungod gyud ang tibuok nilang kinabuhi ug tanan na ngadto kang Cristo. Tan-awa n’yo ang maong pamilya, kung unsa kahan-ay. Tan-awa kanang mga gamay’ng dalagita. Nagatindog sila dinhi, ang—ang ehemplo sa mga batan-ong babaye, o sa mga dalagita. Ug bisan unsa pa . . .

⁷⁹ Mga pipila ka semana ang milabay niadtong nakaagi ko didto sa . . . Wala ko kabalo kung unsay ngalan anang dapita didto, pero sa New York kini, diin napuno og mga beatnik ang usa ka bloke. Karon, kadtong mga dalagita didto nagsul-ob og—og mga huot kaayo nga karsones ug—ug halos wala na’y tabon gawas lang sa gamay’ng bikini, sama sa tawag nila niini, ingon nga pang-taas nga sinina. Ug, oh, daw unsa na gyud ka kagub- . . . Ginabuhath nila kung unsa na lang ang mosulod sa ilang hunahuna, bisan unsa pa kini, mao kana’y hinungdan nganong—nganong gitawag sila’g beatnik. Mahimo nila kung unsay gusto nila. Kung gusto nilang maghigda-higda lang, nga dili motindog, maghigda ra gyud sila ug dili gyud motindog. Kung gusto nilang moadto, mobuhath og usa ka butang, buhathon gyud nila kini; kung dili nila gusto, dili pud nila buhathon. Basta, naglatagaw kanunay ang ilang hunahuna! Ug unsa ma’y padulngan sa hunahuna nga wala-nakabig? Wala ka’y katungod nga buhathon kana, kay dili na ikaw ang tag-iya sa imong kaugalingon; gipalit ka na sa Dios, nga si Jesus Cristo, ang Anak sa Dios nga nahimong unod. Apan, kita n’yo, grabeng katipun-

ogan sa sala!

⁸⁰ Ug makita ninyo kining gagmay'ng, mga dalagita nga lahi gyud; aba, alang kanako, kahayag kini sa panahon sa kangitngit. Usa kini ka nagsanga-sanga nga kahayag, gikan sa nag-ikis-ikis nga liti sa Dios, dinha sa kalangitan aron ipakita nga aduna pa gyu'y Kahayag! Aduna pa gyu'y pagkamatarung taliwala sa kasal-anan!

⁸¹ Si Maria, nga inahan ni Jesus, didto sa siyudad sa Nazaret, ang pinakadautan nga siyudad nga anaa kaniadto sa yuta, apan gikan dinha mipili ang Dios og usa ka gamay'ng gining aron ipakatawo ang Iyang Anak; usa ka incubator, usa ka tagoangkan diin . . . nga pinaagi niini mahimugso ang usa ka Bata. Gigamit Niya ang ingon-ana nga matang sa tawo aron buhaton kini. Ang Dios nagapamuhat pinaagi sa mga tawo aron tubuson ang mga tawo. Mahimo ka Niyang gamiton, mamuhat pinaagi kanimo aron matubos ang tawo, kung bug-os mong itugyan ang tanan nga anaa kanimo.

⁸² Kung ikaw usa ka batan-ong babaye, ihalad ang imong moralidad. Kung ikaw usa ka batan-ong lalaki, ihalad ang imong moralidad, ihalad ang imong hunahuna, ihalad ang imong panghunahuna, ihalad ang imong kasingkasing, ihalad ang imong kalag, ihalad ang tanang anaa kanimo! Ug tugoti si Cristo nga mamuhat pinaagi niana. Pagkamahimayaon nga butang! Anaa ang mga suba nga imong tabokonon, anaa ang—ang mga tulay nga imong labangonon, anaa ka'y—anaa ka'y mga sampinitan nga maagian, anaa'y mga kalibonan, anaa'y kalasangan, anaa'y mangitngit nga dapit, anaa'y hataas nga mga bungtod, anaa'y mga taas nga sak-onon. Unsa ma'y buhaton nimo? Moabot ang adlaw nga kinahanglan mong motindog ug molingi, tan-awon kung asa ka gikan, ug pagahukman ka basi sa dalan nga imong gisubay. Ibutang ang inyong—inyong tanan-tanan, ang inyong hunahuna ug ang inyong mga panghunahuna, nianang Bitoon sa Amihanan (ang sentro sa Dios) ug ayaw gayud pag-irog gikan Niini. Pabilin mismo Niini. Kay dad-on ka Niini diretso sama sa gibuhat Niini sa mga Mago, diretso mismo kang Cristo.

⁸³ Bueno, gipahiran Siya og mirra. Atong nasuta karon, sa Juan 12:1 ug 7, nga mao gyud kini ang Iyang gihimo. Siya ang hingpit nga Alagad sa Dios, ug gidihogan Siya sa tanang Langitnon Niya nga mga gasa. Dinihogan Siya sa tanang mga gasa sa Dios tungod kay Siya'y Dios. Siya'y Dios. Kita n'yo, *ila* Siyang gidalhan og mga gasa.

⁸⁴ Karon, kita'y . . . kung mahimo ko lang unta . . . May mga tawo man gud dinhi nga kanunay, kadaghanan kanila, kabalo mo, magpadala nimo og bisag unsa na lang. Karon, bahin sa pagbalos og pagpanghatag kanila, dili gyud nako mahimo kana. Kita n'yo? Kay tibuok kalibutan man kini. Dili gyud

nako mahimo. Ug akong ginapasalamatang ang bisan mga ginagmay... ginagmay'ng mga butang, ug mga butang nga ginabuhat sa mga tawo aron ipahayag ang ilang pagbati ug pagpasalamat, ug uban pa.

⁸⁵ Karon, ingon niini ang gibuhat niadtong adunahan nga mga lalaki. Mga Mago kining mga tawhana, ug nagpalit sila og bulawan, puro nga bulawan. Nagdala sila og incienso, ang pinakamaayo nga ilang makita. Nagdala pud sila og mirra, kadtong pinakamaayo nga ilang makaplagan.

⁸⁶ Atong nasabtan dinhi, sa San Juan 12, atong nasuta nga kining babaye... kung aduna lang unta kita'y oras para basahon kini, apan dili ko gusto nga dugayon pa kamo, kita n'yo, kay kabalo ko nga ugma Lunes na, ug kamo... ug ang uban kaninyo kinahanglan pa nga motrabaho. Tan-awa, nagdala sila... Kini—kining babaye nagdala niining mirra, kadtong mahalon nga pahumot, aron mawala ang baho sa kamatayon. Ug iyang gibua kining botilyang alabastro ug gibubo kini sa ulo ni Jesus. Ug miingon si Judas, “Aba, angay unta kining gihatag sa mga kabus.” (Miingon, “Dili tungod kay aduna siya'y kalooy sa mga kabus, kondili usa na siya ka kawatan sa sugod pa lang, siya man ang tigdala sa kwarta.”) Ug miingon, “Mas maayo pa unta nga gibaligya na lang kini, kaysa ibubo lang...”

⁸⁷ Ug miingon si Jesus, “Pasagdi siya! Kay gibuhat niya kini...” Gipahiran Siya niadtong babaye, alang sa Iyang paglubong. Kita n'yo? Kining bayhana, gihurot niya ang iyang tanang kuwarta tungod sa kadaku sa iyang pagpasalamat nga napasaylo ang iyang mga sala, ug gikuha niya ang botilyang alabastro ug gibua kini ug gibubo ang lana ug napuno ang tibuok lawak sa kahumot niining mirra, nga iyang gipahid diha Kaniya alang sa Iyang kamatayon. Karon, kita n'yo, gibuhat niya ang maong pag-alagad bisan wala niya hibalo kung unsa gayud ang iyang gibuhat, apan daku gyud ang iyang pagpasalamat sa Dios.

⁸⁸ Kung daku gyud kaayo inyong pagpasalamat sa Pasko, dili ninyo angay isulti, “Ako—ako diay'ng hatagan og regalo ang mga Jones; aron hatagan pud ko nila'g regalo, tan-awon ko kung unsay madawat ko sa buntag.” Nganong dili na lang ninyo ablihan ang inyong kasingkasing ug tan-awon kung unsa ba'y anaa diha, og hibalo kung unsa gayud ang sulod *dinhi*. Ug dawata... kung makita nato nga kini walay sulod, kondili puno lang og negatibong mga kredo ug—ug—ug mga kahingawa nga iya sa kalibutan, nganong dili mo hangyoon si Cristo nga pun-on kini karong gabhiona? Karong gabhiona mismo, aron masabtan nimo ang tinuod nga kahulogan sa Pasko. Si—si Cristo kini nga anaa kaninyo; ang Dios, nga nagapuyo sa kasingkasing sa tawo. Mao kana ang tinuod nga kahulogan sa Pasko.

⁸⁹ Apan, nakita n'yo, karong panahona nahimo na kitang

negatibo kaayo. Nabitik kita sa yawa pinaagi niini, (mga pinintalan nga mga kendi sa pormang baston, ug usa—ug usa ka lagsaw ug usa—ug usa ka bunguton nga lalaki, ug nagalupad-lupad sa kahanginan nga daw eroplano, ug nagabisita kono sa tibuok kalibutan ug sa matag panimalay nga may gipas—an nga sako sa iyang likod nga puno og mga dulaan, ug ginabisita ang matag bata) ug kini—kini usa gyud ka bakak! Usa kini, ka klaro kaayo, nga bakak. Kita n’yo? Karon, kita n’yo? Apan ngano man? Gibuhat kana sa yawa aron iyang matuis ang mga hunahuna sa mga tawo.

⁹⁰ Gisulod na kini sa kalibutan sa komersiyo ug ilang. . .Aba, moginansiya gyud sila og igo sa tibuok Pasko nga puede na sila dili magtrabaho sa tibuok tuig, halos. Aduna ko’y nakaistorya nga usa ka negosyante niadtong miaging adlaw, ingon niya, “Thatag lang kanako kining duha ka semana, ug kung dili lang kinahanglanon sa akong mga trabahante,” miingon, “puede ra ko maghulat hangtud sunod Pasko; makapamingwit pa ako, o unsa man nga gusto kong buhaton, hangtud sa sunod nga Pasko.” Ingon niya, “Pero gapadayon ra ko para may panginabuhi ang akong mga trabahante.” Miingon, “Ginapatrabaho gihapon nako sila dinhi sa igo ra nga mapadayon ang akong negosyo, ug aduna ko gihapon—gihapon og pangbayad sa akong mga trabahante ug ingon-anang mga butang.” Miingon, “Wala gyud ko’y ginansiya hangtud—hangtud moabot ang ting-Pasko.” Nakita ninyo, nahimo na kining usa ka dakung komersyal nga butang nga unta usa kini ka panahon sa pagsimba; usa ka pagsimba.

⁹¹ Karon, ang Dios, hingpit nga nagdihog kang Jesus sa kahupnganan sa Iyang Kaugalingon hangtud nga. . .Siya ang Gasa sa Dios alang sa kalibutan. Nga klarong naila sa mga mago, tungod sa ilang gihalad nga gasa alang Kaniya; nagpakita lang nga sa ilang kasingkasing naila nila kung kinsa gayud Siya, ug kung unsa ang Iyang pagabuhaton para kanila. Busa (dili ikatingala) nga ang una gyud nilang gibuhat, nanagyukbo sila, nga mao gayud ang angay buhaton, ug gisimba Siya. Bisan wala pa nila kini mahisabti, nangyukbo sila ug nanagsimba Kaniya ug dayon gihalad ang ilang mga gasa. Mao kana’y hustong paagi sa pagsaulog sa tinuod nga Pasko: simbaha Siya, dayon ihalad ang imong gasa; nga mao ang paghalad sa imong lawas ingon nga usa ka buhi nga halad, balaan ug nahamut-an sa Dios.

⁹² Apan kabalo ba mo kung unsa ang nahitabo, human nga gibuhat kadto sa maong manggialamon nga mga tawo? Ang amahan ug inahan ni Cristo. . .ang ama-amahan (siyempre) ug usab ang ina-inahan, tungod kay ang Dios man ang parehong Iyang amahan ug inahan. Apan hingsayran nato nga gidawat nila kini nga mga gasa gikan niining mga manggialamon nga mga tawo. Dili ikatingala nga gitawag sila nga manggialamon nga mga tawo. Kay manggialamon gayud sila. Sila tinuod gyud

nga...adunay kaalam. Kung ang mga tawo karong panahona ingon-ana lang unta ka manggialamon, sama ka manggialamon! Mga manggialamon lang nga mga tawo ang moduol kang Cristo. Ang tawo nga nagapalayo gikan Kaniya usa kana ka tawo nga walay kaalam. Apan manggialamon lang nga tawo, ang nagaduol kang Cristo.

⁹³ Karon matikdi! Ug human nga giila Siya sa maong manggialamon nga mga tawo kung mamaunsa Siya, ug nahibaloan nato pinaagi sa Kasulatan nga eksaktong ingon niadto gyud Siya: ang Dios diha sa pagpangalagad alang sa kamatayon. Para sa unsa? Ang Dios diha sa pagpangalagad sa Dios alang sa kamatayon. Si Jesus mao ang Dios sa pagpangalagad alang sa kamatayon, aron tubuson ang kalibutan. Apan unsa ma'y gibuhay sa kalibutan ngadto Niini? Ilang gibalibaran Kini. Ilang gisalikway Kini. Ngano man? Ang uban kanila, kadaghanan kanila, nabuhay nila kana tungod niini: tungod kay namatay man Siya! Ingon sila, "Dili Siya puede mahimong Dios ug dayon mamatay." Ang maong Tawo (ang lawas) dili Dios, kondili ang Dios atua sa sulod niadtong lawas. Kay kining lawasa kinahanglan man mamatay. Ang mismong Cristo nga anaa kanimo mao ang bugtong butang nga makapabanhaw kanimo. Ang Dios kana, ang Dios nga anaa sa sulod nimo.

⁹⁴ Karon, matikdi! Karon, sama ra gihapon karon, ilang gisalikway ang napamatud-ang Dios. Nasabtan ba ninyo kini? Siguradong ipalista gyud nila ang ilang ngalan sa libro sa simbahan ug moingon, "Maningkamot ko nga magkinabuhi sumala niini nga kredito." Manumpa pa sila tungod niana. Apan paghisgotan na gani ang bahin sa pagdawat sa Dios, ug sa pagpahayag og samang matang sa gasa nga ilang gidalit kaniadto...nga maila ka pinaagi sa imong gasa, nga imong itugyan ang tibuok mong pagkatawo ngadto Niini, ngadto sa naila nga Dios. Kung ingon-ana imong ginapaila nga ikaw iya sa Dios, pinaagi sa pagtugyan sa tanang anaa kanimo, kung unsa ka, ngadto sa Dios Mismo.

⁹⁵ Karon, si Cristo niining panahona, nga atong gikapuy-an karon, usa gihapon ka Dio-... ginapaila ang Iyang Kaugalingon: nga Dios, taliwala sa mga tawo. Siya'y Dios gihapon, kay Siya mao man ang Pulong. Ug sa dihang atong makita nga ang Pulong buhi ug ginapadayag ang Kaugalingon Niini, nan atong mahibaloan nga dili gyud kini mahimo sa tawo. Ang Dios kini, ang Pulong nga napadayag diha sa tawo. Ug miingon si Jesus Mismo, "Ang Anak walay mahimo sa Iyang Kaugalingon. Wala Ako'y mahimo, usa lang Ako ka Tawo," ang ingon ni Jesus. "Apan ang Akong Amahan nga nagapuyo Kanako, ginapakita Niya Kanako ang tanang mga butang nga Iyang ginabuhay." Amen! Mao kana! Unsa man kini? Ang Dios nga napadayag diha sa tawo. Karon, mao ra gihapon kini karon; nga ang

Dios, ang gisaad nga Pulong alang niining panahona, mapaila Niya ang Kaugalingon diha kaninyo. Amen! Busa itugyan ang tibuok mong kaugalingon ngadto Niini. Ipakita nga nagatoo ka Niini. Ilha Kini nga Dios: toohi Kini, ug alagari, ug kinahanglang andam ka nga mamatay sa imong kaugalingon ug sa imong kaugalingong mga panghunahuna. Apan karon gisalikway gihapon Kini sama sa pagsalikway Niini kaniadto.

⁹⁶ Matikdi, ang Dios mao'y nagtultol niadtong mga Mago nga may dala nga mga gasa. Sulod sa halos duha ka tuig, nagsunod sila niadto nga Bitoon. Kita n'yo? Ug nagapakita lang nga dili Kini mahimo nga usa ra ka natural nga panghitabo. Kita n'yo? Tungod kay kung ang mga bitoon, sa paglibot nila sa ilang mga orbit, nagkatagboay sila, aduna unta'y makita nga lahi nga panghitabo. Tungod kay . . . gawas kung nakita na Kini sa maong mga Mago, dugay na sa wala pa kini mahitabo, ug nasayod na sila nga dinha sila moagi; kita n'yo, sa mga agianan nga gisubay niadtong mga bitoon. Ug nakaabot gayud sila sa Betlehem niadtong taknaa, nga gikan pa sa halayong mga dapit, tungod kay daan na nila kining nasayran, nga kining mga bitoon mopaingon gayud sa nianang direksyon.

⁹⁷ Karon, ang Dios nagtultol niadtong mga Mago tungod kay dala nila ang hustong mga gasa. Gigiyahan sa Dios kining manggialamon nga mga tawo tungod kay dala nila ang hustong gasa aron mapaila ang Iyang Anak. Ooooooh, grabe! Nasabtan ba ninyo? Kamong manggialamon nga mga tawo karon, pagbarug kamo sa Ngalan sa Ginoo, dili sa usa ka tinumotumo nga butang, kondili sa gasa nga gisaad sa Dios alang niining adlaw, ug ang Dios magatultol kaninyo aron mapaila kanang Jesus Cristo nga mao sa gihapon kagahapon, karon, ug hangtud sa kahangturan. Mao kana: manggialamon nga mga tawo!

⁹⁸ Gitultolan sa Dios kadtong mga gasa kay mao man kadto ang mga gasa aron Siya'y mapaila. Ang manggialamon nga mga tawo, karong panahona, mao kadtong makahimo sa paglingiw gikan sa iglesia-nismo ug sa tanang mga butang nga iya sa kalibutan, paingon ngadto sa Buhi nga Pulong sa Dios! Ug ipaila sa Dios ang Iyang Anak pinaagi sa Iyang Pulong, tungod kay ingon Niana man Siya. "Ako ug ang Akong Amahan usa ra." Ug, "Sa sinugdan mao ang Pulong, ug ang Pulong kauban sa Dios, ug ang Pulong mao ang Dios. Ug ang Pulong nahimong unod ug nagpuyo uban kanato." Ug kana ra gihapon nga Pulong karon, kay Siya mao sa gihapon kagahapon, karon ug hangtud sa kahangturan. Ug ang usa ka manggialamon nga tawo nagasunod Niana, tungod kay mao Kana ang ginatipigan sa Dios aron mapaila ang Iyang Kaugalingon pinaagi Niini. Amen! Usa ka gasa! Usa ka tinuod, nga gipaila nga gasa sa Dios, ginapadala kini sa Dios nga sama niana, aron ipaila ang Iyang Kaugalingon.

⁹⁹ Ug sa ingon nianang paagiha napaila si Cristo: pinaagi sa bulawan, sa mirra, ug sa incienso, pinaagi niadtong mga

lalaki nga ginapakita nang daan ug ginatipo kung unsa ang mamahimong dagan sa Iyang kinabuhi. Kita n'yo? Ang Dios nga napadayag alang sa pagpangalagad, aron mamatay aron matubos Niya ang nasud, tungod kay Siya man ang “magaluwas sa Iyang katawhan gikan sa ilang kasal-anan.” Dili aron luwason ang kalibutan, kondili luwason ang Iyang katawhan gikan sa *ilang* mga sala. Miingon ang Biblia dinhi, “Kay sa—sa Iyang Ngalan mosalig ang mga Gentil.” Kita n'yo? Ang mga Gentil magasalig sa Iyang Ngalan. Amen! Sa laing pagkasulti, ang Pangasaw-onon, ang *tinawag-pagawas* sa mga Gentil, magasalig sa Ngalan ni Jesus Cristo, “Sa Iyang Ngalan magasalig ang mga Gentil.” Karon, gitultolan sila sa Dios, tungod kay sila . . . ang mga gasa nga ilang gidalit, haum gayud niadtong taknaa.

¹⁰⁰ Matikdi! Sama sa gikaingon ko na, ang Dios adunay . . . Iya—Iya nang gipahat-pahat ang Iyang Pulong sa sinugdan pa lang, sa Genesis. Mahimo nakong gamiton ang Genesis ug ipakita kaninyo ang matag kapanahonan sa Biblia, hangtud mismo niining atong kapanahonan karon. Ang tanang mga kulto ug ingon-anang mga butang nga aduna kita karon, mahimo kong ipakita kaninyo kung asa sila kaniadto sa Genesis. Kita n'yo?

¹⁰¹ Nagtagana ang Dios sa Iyang Pulong og ingon ka gidaghanon *dinhi*, og ingon ka gidaghanon *dinhi*, og ingon ka gidaghanon *dinhi*, para sa matag kapanahonan. Ug dayon nagpadala Siya og propeta, nga dinihogan aron matuman ang maong Pulong, ug ginasuportahan niini usab ang usa pa nga moabot. Kita n'yo, sama sa Mesias, nga suportado kaniadto pa. Ang matag propeta sa iyang kaugalingong kinabuhi, sa iyang kaugalingong pagkatawo, ang Pulong nga gitagana alang sa maong kapanahonan, miabot siya ug gituman kanang nahisulat nga Pulong ug gitagna kung mamahimong unsa ang usa pa nga magaabot. Ug ang matag usa kanila naghigot mahitungod Kaniya (amen) tungod kay Siya mao ang kahupnganan, Siya mao ang Ulo sa mga propeta, Siya mao ang Pulong sa Dios, Siya ang mga propeta. Amen! Ingon niana Siya. Himatikdi! Pagkahibulongan gayud kung unsa Siya: matag usa niadtong mga propeta.

¹⁰² Dayon sa dihang miabot na Siya, Siya mao ang kahupnganan sa tanang mga propeta, napadayag; tungod kay sila man kaniadto ang Pulong sa Ginoo, ug miingon Siya Mismo, “Kung kamo nagtawag kanila nga mga dios, kansang Pulong sa Dios nagaabot, unsaon man ninyo pagkondena Kanako tungod ginaingon Ko nga ‘Ako mao ang Anak sa Dios?’” Kita n'yo, bisan kadtong mga propeta sa ilang kapanahonan giila nga mga dios, ug gitawag sila sa Dios, Mismo, nga “mga dios.” Unsa man sila kaniadto? Sila mao'y mga kapahayagan sa Iyang Pulong. Ug karon ania na Siya, ang kahupnganan sa Pulong, ang Dios nga mipuyo sa lawas sa tawo, ang Dios nga nadayag diha sa unod.

¹⁰³ Tan-awa! Kay kadtong mga gasa, nga gidala niining mga

lalaki, dili nila kadto mahimong idalit sa usa ka propeta. Dili mahimong haum. Kita n'yo? Kadtong mga gasa dili kadto puedeng idalit kang Elias, dili kadto puedeng idalit kang Moses, kinahanglan ngadto lang gyud Kaniya. Ug ingon nga kadtong mga gasa nakatagana lang gayud alang niadtong adlaw, ug aron ipaila kung Kinsa gayud Siya pinaagi niadtong mga gasa, busa atua ang Dios nga nagauban ug nagapanalipod Kaniya. Ug gigiyahan sila, sulod sa duha ka tuig nga panaw, hangtud nga ilang nakita ang Hingpit nga Kahayag. Haum gayud kaayo!

¹⁰⁴ Mao ra gihapon karong panahona. Aduna kita'y mga tawo nga ingon gayud ka matinuuron, buotan nga mga tawo, sinsero nga mga tawo. Apan, nakita n'yo, dinha, aduna gayu'y motungha, nga mao ang kanunay'ng ginabuhat sa Dios, aron ipaila kining panahona. Mao na kining panahona nga mahitabo kining mga butanga nga gisulti na kaniadto. Dili daghan, gamay ra kaayo, gamay ra gayud ang maluwas. Ingon niana ang gisulti sa Biblia. Pipila ra gyud.

¹⁰⁵ Si Jesus Mismo ang nagsulti, “Maingon sa nahitabo kaniadto sa mga adlaw ni Noe, diin walo ra ka kalag ang naluwas.” Walo ra ka mga kalag, gikan sa usa ka—usa ka henerasyon nga sama ra niini karon. “Maingon sa nahitabo kaniadto sa mga adlaw ni Noe.” Unsa man kadto? Bantugan, edukado nga mga tawo, batid nga mga magbubuhat, maayo nga mga magtutukod, ang tanan maayo gayud sama nila kaniadto. Nagtukod sila'g sibilisasyon nga sama niini, maayo kaayong mga butang nga aduna kanila kaniadto. “Ug maingon sa nahitabo kaniadto sa mga adlaw ni Noe, mao man usab ang mahitabo sa pag-abot sa Anak sa Tawo.” Kita n'yo? Ug ang Dios adunay Noe nga magpaila sa Iyang gisaad nga Pulong. Tukma gyud kaayo kadto. Haum gayud kadtong arka sa Pulong sa Dios nga iya nang gisulti daan, nga Iyang pagalaglagon ang tawo. Apan giluwason ni Noe ang mahimo niyang luwason.

¹⁰⁶ Karon, kining manggialamon nga mga lalaki, nagdala og ilang mga gasa, nga mao'y nagpaila. Gipaila sa ilang mga gasa kung unsa Kini, ug mao kana'y hinungdan nga gitipigan sa Dios kadto nga mga gasa sa matag panaw nga ilang gihimo. Gipanalipdan Niya Kini hangtud nga nakaabot sila nga dala ang maong mga gasa, tungod kay kadto haum gayud niadtong taknaa. Nasabtan ba kana sa akong iglesia? Mao usab kana ang nagakahitabo karon! Nanghinaut ko nga dili unta kana molabay lang ibabaw sa inyong ulo. Kinahanglan kong isulti kini pinaagi sa samingay, halos, nakita n'yo. Apan nasabtan ba ninyo? Kini ang mga butang nga nagakahitabo karon nga haum gayud sa atong kapanahonang, Laodicea. Kini gyud ang tukma nga panahon, maong ang Dios nagtipig gayud Niini. Kita n'yo, gitipigan Niya Kini hangtud niining panahona aron ipaila ang Iyang Kaugalingon. Ang maong mga gasa, kamatayon man ang kabayaran niini, nahimo kining babag sa ilang dalan. Tukma

na gayud kini nga panahon, husto kana, tukma gayud alang sa maong adlaw. Mao kana'y hinungdan nga gipanalipdan gyud Kini sa Dios, sa paagi nga Iyang gibuhat. Iyang panalipdan Kini, hangtud ang Iyang katuyoan mamatuman.

¹⁰⁷ Oh, nakabasa ko og usa ka sugilanon, nga akong nahinumduman dili pa lang dugay, mahitungod sa butang nga atong ginahisgotan karon. Adunay usa ka dakung siyudad, dinhi niini nga nasud, ug . . . sa New York kini. Ug bisperas kadto sa Pasko. Ug adunay usa ka kabus nga pamilya didto. Usa ka makaluluoy'ng amahan, aduna siya'y TB, ug siya'y . . . ug ang iyang asawa aduna pud og TB. Pit-os kaayo ang ilang kahintang. Ug siya—siya mora og . . . Masakiton gyud siya maong walay gustong magpatrabaho kaniya. Wala siya'y edukasyon, ug siya—siya . . . wala gyu'y ganahan mokuha niya.

¹⁰⁸ Usa mismo siya ka sinalikway, nahimo siyang libodsuroy. Mora lang og . . . kabalo na mo kung unsa ang libodsuroy, mao kanang nagabaktas-baktas bisan asa ug—ug nagapamunit og bisag unsa, ug dayon ibaligya kini ug dawaton na lang bisan pila ang ibayad mo niini; bisan unsa pa kagamay nga ganansya ang ilang makuha gikan niini, ila na lang kini paigoan aron mabuhi. Sama sa . . . sama sa usa ka manunuroy o mora'g ingon-ana, diha sa dalan; mamalit og mga alpiller ug mga dagom ug mga didal, ug bisag unsa na lang nga ilang mapalit. Ug—ug bitbiton niya kini, ug—ug siguro usa ka sentimos iyang palit sa usa ka pakete, ug ibaligya kini og lima ka sentimos; ug mokita og upat ra ka sentimos kada pakete, ug tingali tibuok adlaw na kana nga ganansya. Moingon mo, “Daku-daku na pud nga—nga ganansya oy.” Pero hunahunaa lang, ang tanan nga iyang mabaligya sulod sa usa ka adlaw. Tingali'g mokita ra og baynte, o traynta sentimos kada adlaw, ug aduna baya siya'y pamilya.

¹⁰⁹ Ug ang—ang makaluluoy'ng asawa, tungod kay masakiton na, siya'y—siya'y namatay.

¹¹⁰ Ug hapit na mag-Pasko kadto. Ug kadtong iyang gamay'ng anak nga babaye, natakdan usab og . . . gumikan sa malnutrisyon, kay wala sila'y igong makaon ug bitamina; natakdan siya og TB, usab. Ug usa siya ka gamay'ng bata, ug mga walo, o siyam ang pangidaron, o mga napulo. Ug wala pa gayud siya makadawat og munyeka sa matag moabot ang Pasko. Ug mao gyud kana ang iyang gipangandoy nga regalo, usa ka munyeka.

¹¹¹ Ug ang amahan, ingon nga wala siya'y kasarang nga madala ang iyang anak nga babaye sa doktor ug uban pa, nakita . . . nakita niya—niya nga ang iyang anak nga babaye paspas nga nagkagrabe ang iyang sakit, ug naningkamot gyud siya kutob sa iyang mahimo nga—nga—nga—nga makatigum og igong kuwarta aron mapalitan siya'g munyeka para sa Pasko; kung aduna lang unta siya'y kuwarta para mapalitan siya'g gamay'ng munyeka!

Ug kay hapit na gyud ang Pasko, nagkasamot ang kamaut sa panahon, mao nga nakuha sa bata ang usa ka klase sa pulmonya, ug—ug namatay siya, pipila na lang unta ka semana bag-o mag-Pasko. Ug ang amahan, siyempre, grabeng-kasubo, gikuha niya ang iyang gamay nga alkansiya nga lata ug gikuha ang kwarta. Ug nahunahunaan niya ang iyang anak nga babaye, ug kung unsa gyud niya ka pangandoy ang usa—usa ka munyeka sama sa ubang gagmay'ng mga batang babaye. Kita n'yo, nagapakita na siya og kinaiya sa usa ka inahan bisan gamay pa.

¹¹² Namatikdan ba ninyo nga ang usa ka bata nga babaye, madani gyud siya sa munyeka, tungod kay siya. . . mao kana'y iyang kinaiyahan, nga siya—mahimo man siya nga inahan sa umalabot. Mamahimo gyud siyang inahan sa umaabot nga adlaw kung mabuhi pa siya ug tanan na. Kabalo na mo, sa iyang kinaiyahan. Mao kana'y hinungdan nga gusto gyud sa usa ka batang babaye ang gamay'ng munyeka, gusto niyang atimanon kini; kay sa tinuod lang, siya—siya usa ka gamay, sa potensyal, usa—usa—usa ka inahan.

¹¹³ Ug nangandoy gyud siya og usa ka gamay'ng munyeka, ug ngani wala gyud siya nakadawat og bisan usa sukad. Ug naningkamot gyud unta'g tigum si Papa kutob sa iyang mahimo aron—aron mapalitan siya og usa ka gamay'ng munyeka. Ug, ang nahitabo lang, namatay ang bata.

¹¹⁴ Ug ang amahan daw nawad-an og maayong pangisip. Gikuha na ang iyang asawa, pati ang iyang gamay'ng anak nga babaye, ug ang iyang pangisip mora'g miabot na sa punto nga iyang—iyang. . . nga iya—iya gihapong istoryahon ang iyang anak nga babaye inig tulog niini kada gabii, bisan og. . . gilubong na kini. Pero abi gyud niya nga nagapakig-istorya gyud siya—siya sa iyang anak, ug ang ingon niya, “Karon, Langga, hapit na gyud, nga mapalitan ka ni Papa og munyeka karong Pasko. Ug—ug saad gyud kini ni Papa kining munyeka para sa imo, ug ako—ako—ako gyud kining paliton.”

¹¹⁵ Sa katapusan, miabot na gyud ang Pasko. Ug, siyempre, kabalo na mo kung unsay kasagaran mahitabo. Ang mga adunahan adunay ilang—ilang dagkung mga kumbira; ug—ug gidagkotan ang mga kandila, ug nagapahigayon og dagkung mga misa ang mga kasimbahanan, ug nagahisgot mahitungod kang Jesus ug—ug uban pa (didto sa mga simbahan), ug ginapahigayon ang tanan na nga matang sa proseso sa misa, ug nanag-awit, ug adunay karoling ug tanan na. Apan wala sila nasayod kung unsay nagakahitabo didto sa likod sa eskinita, sa luyo niining tanan.

¹¹⁶ Atua didto kadtong makaluluoy'ng tawo, nga mora'g nawala na sa iyang kaugalingon. Gusto kaayo niya nga mahatagan og munyeka ang iyang gamay'ng anak nga babaye, kay mao gyud kini ang dugay na kaayong gipangandoy sa bata. Busa

migawas siya ug mipalit og gamay'ng nuug nga munyeka, usa ka gamay'ng—usa ka gamay'ng butang, siguro mga tag-traynta sentimos lang; usa ka gamay'ng bulingon nga munyeka ang iyang napalit, didto daplin sa kalsada. Ug grabe gyud ang katugnaw niadtong gabhiona, ug—ug—ug gabagyo og niyebe, kusog gyud kaayo ang ulan sa niyebe didto; ug New York baya kadto, nga duol ra sa baybayon.

117 Ug puno na kaayo ang mga kadalanan; ug ang mga tawo nakasakay sa ilang mahalón, dagkung mga sakyanang limousine. Ug puro huboghubog nga kasadya, puro pag-inominom, ang ilang pagsaulog sa pagkahimugso ni Cristo ug sa mga butang nga atong ginahisgotan karong gabhiona, nga nagtoo sila nga mao kana ang saktong paagi sa pagsaulog; ipaagi og huboghubog ang ilang karaang mga kasub-anan ug ingon nianang mga butang, ug kana—nagdahum nga kana na gyud ang tukmang paagi. Sila tanan . . .

118 Nagtindog ko sa may tindahan, niadtong usa ka adlaw, ug adunay babaye didto nga naghisgot bahin sa kung unsa kono . . . duha ka mag-igsoong babaye ang nagkita didto ug nagistoryahanay sila kung unsay ilang ihatag sa ilang papa. Ug miingon ang usa kanila, “Bueno, siya . . .” Gipalitan kono niya og usa ka kaha sa kung unsa man nga klase sa sigarilyo. Ug miingon pud ang usa nga gipalitan pud kono niya ang iyang amahan og uno quinto nga whiskey ug usa—ug usa—ug usa ka kahon sa baraha. Karon tan-awa kono kung haum ba kana nga gasa sa pagdumdum sa pagkahimugso ni Ginoong Jesus Cristo! Ug mao na kana ang naandan, kita n'yo, usa lang kini ka daku nga pundok sa mga nagagilakgilak nga butang. Wala na gyud diha ang tinuod nga kahulogan sa Pasko.

119 Ug atong makita karon, nga kining makaluluoy nga lalaki, bisan asa na lang nag-acto. Ug nasayod siya sulod sa iyang kasingkasing nga wala na gyud ang gamay niyang anak nga babaye, pero mipalit gihapon siya og munyeka. Ug nahunahunaan niya, “Maglakaw-lakaw lang siguro ko, basin makit-an ra nako siya unya sa kung asa man. Anaa ra siguro siya sa daplin sa kalsada dinhi ug basin makit-an ra nako siya unya.” Ug misugod siya og baktas.

120 Siya—dili na niya malimbongan ang iyang kaugalingon, kay wala na gyud ang iyang anak didto sa ilang gamay'ng payagpayag ug wala na didto sa gamay'ng, nagkagidlay, mahugaw nga higdaanan; kondili, gilubong na siya. Busa, siya—kabalo gyud siya. Naghunahuna lang siya nga basin makita ra niya ang bata didto sa dalan. Ingon niya, “Magpadayon lang ko sa paglakaw.” Ug galakaw-lakaw siya didto sa mga eskinita, samtang ang mga tawo nagakanta sa ilang mga awit sa Pasko ug nagapadayon sa ilang pagsaulog. Ug samtang galakaw siya sa eskinita, nga dala kining gamay'ng, bulingon nga munyeka;

gikuptan niya kini sulod sa iyang kupo, duol sa iyang dughan, samtang nagahunahuna sa iyang gamay'ng anak nga babaye.

¹²¹ Ug wala madugay adunay usa ka pulis nga nakakita kaniya, ug kadtong mismong pulis medyo nakainom na og gamay, ug midagan siya sa eskinita ug gihawiran ang tigulang nga lalaki ug gipalingi kini. Miingon ang pulis, “Unsa ma’y ginabuhat nimo nga galakaw-lakaw dinhi?”

¹²² Ingon niya, “Dad-on nako kining gamay'ng munyeka, sir, sa akong gamay'ng anak nga babaye.”

¹²³ Miingon ang pulis “Buena, asa man ka nagpuyo?” Ug iyang gisultihan ang pulis kung asa siya nagpuyo. Miingon ang pulis, “Buena, mas nagapalayo ka hinoon didtong lugara, hubog ka man tingali. Balik ngadto sa pikas dalan.”

¹²⁴ Ingon pa, “Sir, ako—dili man ko hubog. Gisaaran man gud nako ang akong gamay'ng anak nga babaye nga hatagan nako—nako siya og regalo sa Pasko.” Ug ang ingon pa, “Ang angay nga regalo para sa usa ka gamay'ng batang babaye mao man ang gamay'ng munyeka.”

¹²⁵ Ug miingon ang pulis, “Pakit-a daw ko.” Busa gipakita niya kadtong gamay'ng, bulingon, nga nuug nga munyeka. Ug gigunitan niya kadto sa iyang . . . duol sa iyang dughan, gakupot niadtong gamay'ng munyeka samtang siya . . . Ug busa kadtong pulis, tungod kay medyo hubog na, mismo, iyang gitulod ang tigulang palakaw ug siya midayon pud sa iyang lakaw. Nagpadayon sa paglakaw ang maong tigulang sa eskinita, ug kusog kaayo niadto ang pag-ulan sa niyebe.

¹²⁶ Ug, dayon, nahuman ra gyud ang ilang mga pag-party-party pagka-tungang gabii. Pagkabuntag, mihunong na ang pag-ulan sa niyebe, og migawas na ang adlaw. Ug busa ang mga tawo . . . ang tanang tawo nga gikan sa ilang mga paghudyaka sa pag-party-party . . . aduna na’y mga puyo sa yelo sa ilang mga ulo, tungod sa sobra nga pag-inom ug pagsaulog sa—sa pagkahimugso ni Cristo. Ug—ug daghan sa ila ang nangapagaw tungod sa paghudyaka, ug sa tanang paglipaylipay.

¹²⁷ Apan didto sa eskinita, ilang nakit-an ang tigulang nga lalaki. Ug niadtong ila na kining gipahayang, nakatago gihapon kadtong gamay'ng munyeka duol sa iyang dughan. Nagtoo ko nga iya na gyud nga nahatag sa iyang anak kadtong iyang regalo. Iya na gyud nakit-an ang iyang anak sa usa ka Yuta nga dili dinhi. Iyang—iyang—iyang gidala ang maong gasa. Usa kadto ka tukma nga gasa. (Dios, malooy Ka.) Pero nahimo kadtong baylo sa iyang kinabuhi. Wala na’y lain pang paagi sa kalibutan nga iyang mahatag ang gasa ngadto sa bata, kay gilubong na kini. Apan ang bugtong paagi nga iyang mabuhat kadto, mao’y mobiya nga sama niadto. Dili gyud ingon ka mahinungdanon, sa akong tan-aw, kadtong gamay'ng munyeka nga bulingon-ang-nawong, apan kini . . . unsa ma’y nahimo niadto para sa

maong lalaki? Kadto ang katumanan sa iyang gisaad. Bisan unsa pa'y hunahuna sa mga tawo mahitungod niini, ang iyang mga bulingon nga kamot nga nagkupot sa gamay'ng, bulingon nga munyeka, apan kadto—kadto ang katumanan sa iyang saad para sa iyang gamay'ng anak nga babaye.

¹²⁸ Usahay ang tan-aw sa mga tawo sa Ebanghelyo daw kanta-kanta lang, pagduladula, gisalikway nila Kini niadtong gihatud Kini sa Dios, apan mao kini ang katumanan sa saad nga Iyang ihatag ang Iyang Anak. Ug kabalo ba mo? Ila Siyang gibiyaan aron mamatay, sama ra, usab sa usa ka libodsuroy didto sa dalan. Eksakto gyud kana, gibiyaan lang nila Siya nga mamatay sama sa usa ka libodsuroy didto sa dalan. Ug hangtud karon ginatrato gihapon nila Siya nga sama sa usa ka libodsuroy didto sa dalan, apan gituman Niya kung unsa gayud ang angay Niyang buhaton. Siya mao ang Gasa nga gisaad sa Dios sa kalibutan.

¹²⁹ Karong gabhiona, tugoti kong dawaton Siya sa *akong* kasingkasing ingon nga akong Manluluwas. Tugoti ako nga magalakaw bisan pa sa atubangan sa akong kamatayon, o unsa man kini, nga sama niana. Gisaad ko ang akong kinabuhi ngadto Kaniya. Gusto kong dalhon kini ngadto Kaniya. Bisan unsa pa'y akong agian, bisan pa'g kinahanglan kong moagi sa kamatayon, bisan pa'g pusilon ko; bisan unsa pa ang mahitabo, tamayon man ko, tawgon og “buang,” ug tanan na, isalikway man ko sa ubang Cristohanong mga iglesia ug uban pa, ako. . . kini usa ka gasa sa Dios nga akong pagatipigan sa akong kasingkasing. Gihatag Niya kini, ug gusto kong dad-on kini ngadto Kaniya.

Iduko nato ang atong mga ulo sa makadiyut.

¹³⁰ Tukmang mga gasa nga akong ginahisgotan, usa kadto ka tukma nga gasa tungod kay ang maong batang babaye. . . usa siya ka gamay'ng batang babaye, nga mahimong, usa ka gamay'ng inahan (unta), mao nga tukma gyud nga gasa kadtong gamay'ng munyeka. Ang usa ka tukma nga gasa nga ang Dios, ang Magbubuhat, mahimo Niyang ihatag sa Iyang mga binuhat, mao ang usa ka Manluluwas nga magaluwas niini gikan sa kahimtang nga iyang nahimutangan. Nahunahuna ko, karong gabhiona, samtang haduol na kita sa Pasko karon, ug sa akong tan-aw kini na tingali ang katapusang mensahe nga atong madungog tali karon ug sa Pasko, gawas lang kung makapaminaw kita og mensahe sa radyo gikan sa uban.

¹³¹ Nahunahuna ko, karong gabhiona, kung gidawat na ba nato ang Gasa nga gisaad sa Dios kanato: ang Kinabuhing Walay Katapusan, pinaagi sa pagtoo kang Cristo ug sa pagdawat sa Balaang Espiritu. Kung wala pa, ug gusto ninyong madawat ang tinuod nga gasa sa Dios, ang tinuod nga pang-Pasko nga gasa, mahimo ba ninyong ipataas ang inyong kamot? Moingon, “Igoong Branham, ako—wala ko kabalo, ako—usahay nagatoo man ko Niini. Ug nakita ko ang mga butang nga akong

ginabuhat. Ug mora ko'g, medyo, nagduhaduha.” Ayaw—ayaw na pagduhaduha, mga higala.

¹³² Kita n'yo, ulahi na para—para magduhaduha pa karon. Kinahanglan nga masiguro gyud nato kini. Moingon, “Tampo ako, Igsoong Branham, ug gusto ko. . . ang Gasa sa Dios para sa kalibutan, nga mao si Jesus Cristo. Ako—ako—gusto ko nga mamahimo kining tinuod nga Pasko. Ginadawat ko ang Balaang Espiritu sa akong kasingkasing. Nga magapanalipod kanako taliwala sa tanang mga unos sa kinabuhi, ug sa umaabot nga adlaw makaduol ako sa Iyang Presensiya nga dala kining gasa sa Kinabuhing Walay Katapusan. Iya kong dawaton sa maong basihanan, kay kini ra gyud ang paagi nga madawat Niya ako.”

¹³³ O, anaa na ba kaninyo ang hustong gasa karong gabhiona? Ang husto nga matang sa kinaiya? “Amahan, mosunod ako Kanimo bisan asa Ka moadto. Bisnansa ma'y Imong isulti nga ‘Buhata,’ pagabuhaton ko kini. Unsa man ang isulti sa Imong Pulong para kanako, ‘Buhata,’ pagabuhaton ko kini. Oo, Sir, dili ko igsapayan kung unsa ma'y isulti sa uban, pagabuhaton ko kini tungod kay gusto ko ang Imong Gasa; Kinabuhi kini, ug si Cristo mao ang Pulong.”

¹³⁴ Kung dili nimo mahimong toohan ang tibuok Pulong, ug moingon, “Bueno, wala ko kabalo, ako—nagatoo man ko nga. . . *kini*, nagatoo man ko *niana*, apan dili lang ko uyon *niini*, dili ko uyon *niana*.” Sama ra ka niadtong setenta nga mibiyang. Dili nila madawat ang tibuok Pulong ug si Cristo diha sa kahupnganan sa Iyang pagka-Dios ug sa Iyang pag-alagad; nga andam mamatay sama sa gibuhat ni Cristo alang kaninyo.

¹³⁵ Kung ingon-ana mahimo ba ninyong ipataas ang inyong kamot, samtang nagaduko ang inyong ulo, ug moingon, “Tampo ako”? Panalanginan ka sa Dios. Ug panalanginan ka sa Dios. Panalanginan ka sa Dios. Panalanginan ka sa Dios, batang babaye. Oh, panalanginan ka sa Dios. Oo, nakita ko ang imong kamot. Panalanginan ka sa Ginoo, oo. Kining gamay'ng Gasa, ni Cristo, nga gipadala sa Dios ngadto sa kalibutan; ug gipaila Kini pinaagi sa. . . gipaila Kini sa mga Mago, gipaila Kini sa Iyang Kaugalingong kinabuhi, gipaila Kini sa Iyang kamatayon, gipaila Kini sa Iyang pagkabanhaw, gipaila Kini sa imong pagdawat, ug gipaila Niya ang Iyang Kaugalingon uban kanimo nga ikaw Iyaha ug Siya imoha. Kung dili ka gayud. . . tan-awa, ang epekto sa Espiritu sa Dios nga nagapamuhat diha kaninyo, niining panahon sa Pasko, hinaut nga moabot kini diha kaninyo karon.

¹³⁶ Langitnong Amahan, samtang kami nagsusapinday sama sa libodsuroy sa dalan, wala gayu'y bisan usa nga nanumbaling kaniya. Nagpadayon lang ang kalibutan sa ilang binuang nga mga pagsaulog, ingon niana usab sila karong gabhiona, Ginoo. Apan usahay mobati kami nga sama niadtong libodsuroy, apan

aduna man kami'y nadawat nga Gasa. Busa nagaampo kami, Amahan, nga Imo kaming himoon nga usa ka gasa, nga kahayag, alang niining naghimalasyon na nga kalibutan. Daghan dinhi ang nagpataas sa ilang mga kamot nga gusto nila ang mao nga Gasa sa Dios nga kinahanglan Niya, Mismong, ihatag ang Iyang bugtong nga Anak, mikanaug, nahimong usa ka Tawo. Nagpakaubos gayud Siya nga sila wala gani. . . Mianhi Siya nga nagpakaubos kaayo ug grabe ka mapainubsanon hangtud nga wala gani Siya'y—Siya'y higdaanan nga giananon Kaniya. Gikinahanglan pa sa usa—usa—usa ka baka. . . o kabayo o unsa man didto nga ipagamit ang pasungan niini, misibog na lang, (ang usa ka hayop) tungod kay ang mga tawo okupado na kaayo sa ilang kahimtang niadtong panahona. Siya—mikanaug Siya didto sa usa—sa usa ka pasungan, sa usa ka gamay nga karaang langub nga kuwadra sa kilid sa bungtod didto sa Betlehem, nga usa ka gamay'ng siyudad nga gitukod sa anak sa usa ka bigaon daghang katuigan na ang milabay.

137 Ug karon, Ginoo, nahibaloan namo nga usa niadto ka gabii, sa usa kadto ka mabugnaw nga gabii, giingnan Siya, “Rabbi, buot kami nga mouban Kanimo pauli karong gabhiona.”

138 Ug miingon Siya, “Bueno, karon, ang mga langgam adunay ilang mga salag, ug—ug ang mga lobo adunay ilang mga lungib, apan Ako—Ako—Ako wala gayud. . . ni dapit nga kapahulayan sa Akong ulo.” Ug sa ingon niana nga paagi nga ila Siyang gipasagdan nga mamatay, sama niadtong libodsuroy sa dalan.

139 Langitnong Amahan, mahimo ba nga ang—ang Cristohanon, makita na unta sa mga tawo karon nga—nga Kana mao gyud ang halangdong Gasa? Ug daghan ang ania dinhi, karong gabhiona, sobra pa sa usa ka dosena, tingali, ang nagpataas sa ilang mga kamot nga nagtinguha nga madawat ang Balaang Espiritu. Hinaut adunay sama sa manggialamon nga mga lalaki, nga bisan wala sa tanang uban pa diha sa kongregasyon ang makakita kung unsa na ang nagakahitabo. Ug kini nga Bitoon, milabay kining mistikal nga Kahayag ibabaw sa mga obserbatoryo, sulod sa duha ka tuig, diin ang mga tawo kaniadto nagatutok sa oras pinaagi sa upat ka pagbantay, nagatutok sila sa mga bitoon aron masayran ang oras. Walay si kinsa man, walay magsasaysay ang nagsulat bahin niini. Wala gyu'y si bisan kinsa ang nahibalo bahin Niini, ug bisan pa niana atua Kini didto. Ug kining mga manggialamon nga mga lalaki, nga dala-dala ang ilang tukma nga gasa, gitultolan ngadto Niini. Hinaut nga ang mao ra nga Kahayag mosulod sa matag kasingkasing, dinhi karong gabhiona, sa mga ania karon. Mahimong walay unsa man nga emosyon, mahimong walay *ingon niini*, *ingon niana*, ug mahimong walay uban pa ang makahibalo niini, kondili kadto lang ang manggialamon nga mga lalaki. Apan hinaut nga adunay butang nga molukop gayud sa kasingkasing niining mga kalalakin-an, niining mga kababayen-an, niining

mga batan-ong lalaki ug niining mga batan-ong babaye karong gabhiona, nga kanang Gasa sa Dios magadihog sa ilang kinabuhi. Nga sugod niining gabhiona, mabag-o na sila. Dili na sila mamahimong sama sa kung unsa sila kaniadto. Mamahimo na silang usa—usa ka gibag-o nga binuhat sugod karon. Hinaut nga sila, sama sa manggialamon nga mga lalaki, isalikway ug dili na mobalik sa mga urog sa kalibutan (ug kang Herodes, sa palasyo sa hari), “Apan ingon nga gipasidan-an na sa Dios, mibiya sila.” Itugot kini, Ginoo.

¹⁴⁰ Karong gabhiona nagaampo ako nga ang matag maalamon nga lalaki, batang lalaki, o batang babaye, nga ania karong gabhiona. . . Ang lalaki o babaye nga adunay igong kaalam nga mobiya sa mga butang nga iya sa kalibutan karong gabhiona, dili na gayud mobalik sugod niining adlaw. Human sa—sa paglabay niining adlaw ug gabii, hinaut nga dili na sila mobalik pa sa mga butang nga iya sa kalibutan, kondili magpakamanggialamon unta sila. Ug kining gamay’ng makahibulongang Tingog nga nakapahimo sa pagpataas sa ilang kamot ug sa pagsulti og, “Oo, gusto ko kining Gasa sa Dios. . .” Hinaut nga kanang mao rang butang nga nakapahimo kanila sa pagpataas sa ilang kamot, mao usab ang magpaila kanila karong gabhiona uban sa Iyang kamatayon, paglubong, ug pagkabanhaw, pinaagi sa paghatag kanila sa Balaang Espiritu. Hinaut unta nga mobiya na sila.

¹⁴¹ Hinaut nga kining mga kababayen-an nga ania karong gabhiona, Ginoo, kadtong mga naglisud nga dili makig-uyon sa kalibutan; naglisud nga patas-on ang ilang mga buhok, ug magbisti og angay para sa usa ka gining, ug tangtangan kanang mga meyg-ap ug ingon-anang mga butang, kanang mga artipisyal, kana’y nagapakita. . .kini—kini medyo nagapaila kanila nga sila dili himsog, nga sila. . .adunay—adunay butang nga sayup diha kanila. Ug hinaut karong gabhiona, kining gamay’ng misteryosong Kahayag, Ginoo, nga nakapahimo kanila sa pagpataas sa ilang mga kamot, hinaut makapahimo usab kini kanila sa pagsulti og, “Ginoo, talikdan na nako ang mga butang nga iya sa kalibutan, karong gabhiona.”

¹⁴² Kining mga bana nga wala pa nakabaton og—og—og tinuod nga butang, nga magpahinungdan kanila nga sultihan ang ilang mga asawa ug makapahimo sa ilang asawa nga mobiya sa kalibutan; ug sa mga butang nga ilang ginabuhat. Hinaut nga kaming tanan, Ginoo, mobiya na karong gabhiona, ingon nga napasidan-an na sa Dios pinaagi sa maong talagsaon nga mensahe mahitungod sa—sa Kahayag sa Dios nga miigo sa among mga kasingkasing. Hinaut nga mobiya na kami sa kalibutan karong gabhiona ug—ug magkinabuhi na alang Kanimong sa nahabilin namong mga adlaw, og mopauli—mopauli na nga kauban Ka diha sa uban na nga dalan kay sa among naandan na nga ginaagian. Itugot kini, Ginoo. Himoa kaming

mas maayo nga mga Cristohanon, ang matag Cristohanon nga ania karong gabhiona, Amahan, nga midawat Kanimo ug nagatoo Kanimo. Ug naningkamot gyud sila nga magkinabuhi og usa ka kinabuhing Cristohanon, apan karong gabhiona, hinaut nga mobiya na gyud sila sa kalibutan, hinaut nga madawat nila ang maong Gasa.

¹⁴³ Oh Dios, kini—usa kini—usa kini ka tinamay nga dalanon. Pagatawgon ang mga kababayan-an og “kinaraan,” tawgon sila og bisan unsa na lang. Ug pagatawgon usab ang mga kalalakin-an nga “panatiko.” Apan kami—andam na kami, Ginoo.

¹⁴⁴ Balaang Espiritu, ipahilayo kami sa kalibutan, karon mismo. Ipahilayo ako sa kalibutan, Ginoo. Ako—ako—dili gayud ako gusto nga mosubay sa bisan unsang dalan nga magpalayo kanako gikan Kanimo. Ginoo, ako—gitinguha ko nga mosubay lang sa dalan nga gusto Nimong akong agian. Gusto ko nga ang gasa sa akong kasingkasing mamahimong hingpit gayud nga mapaila Ka niini, Ginoo, dinhi sa kalibutan, nga Ikaw dili patay, nga Ikaw buhi gayud.

¹⁴⁵ Ikaw mao ang Dios sa mga buhi, dili Dios sa mga patay. Ang mga patay ginatugpahan na og ayo sa mga langaw, ug mga lagong, nga nagadala og mga kagaw ug mga lagong; sama sa usa ka lalaki nga mitilaw sa iyang unang makahubog nga ilimnon, misuyop sa iyang unang sigarilyo, misulti sa iyang pinakaunang bakak, biyaan ang iyang asawa sa unang higayon; o asawa nga ginabiyaan ang iyang bana, o nagabuhat og mga butang nga sayup; nga daw gitugpahan sila'g lagong, ug kini. . .sila nanaghan gayud. . .nga nahimo nang tipun-og sa mga lagong og kahugawan, tungod kay sa sulod niini patay nga kalag. Mao kana ang ginasadlan sa mga dautang espiritu. Ug usa lang ka dautang espiritu makapahimo na kaniya og usa pa ka butang; ug aduna na pud og usa pa nga moabot, nga magtukmod kaniya nga magbuhat og usa na usab ka laing butang tungod kay gibuhat na nila *kini*.

¹⁴⁶ Dios, hinaut nga mobiya na sila sa kalibutan ug mamalik ngadto sa Kinabuhi. Hinaut nga mamangon sila, ug ang mga Manulonda sa Dios mokanaug nga dala ang mga gasa sa Kinabuhing Walay Katapusan, Ginoo, ug managpadayon sila nga may sunodsunod nga kadaugan. Itugot kini, Amahan. Nagabiya na kami, karong gabhiona, gikan sa mga butang nga iya sa kalibutan ug sa mga kahingawa sa kalibutan, ingon nga gipasidan-an na sa Dios nga haduol na gayud ang panahon, nga mobalik na si Jesus sa yuta. Ug hinaut nga ihatag kanamo sa Gamhanang Balaang Espiritu, karong gabhiona, kanang Kinabuhing Walay Katapusan nga among ginahandum. Itugot kini, Ginoo. Kami—nagaampo lamang kami nga Imong igahatag kining mga panalangin kanamo samtang amo kining ginapangamuyo sa Ngalan ni Jesus Cristo.

Samtang nagaduko ang atong mga ulo:

¹⁴⁷ Kadtong mga manggialamon nga mga lalaki kaniadto miadto nianang . . . nagsunod niadtong Kayahag paingon sa . . . og ilang nakaplagan ang Hingpit nga Kahayag. Ug hinaut nga ang maong gamay'ng Kahayag, karong gabhiona, nga nakapahimo kanimo sa pagpataas sa imong kamot, o tingali wala ka pa gani . . . Naigo ka niini, pero wala ka nagpataas sa imong kamot, hinaut nga kana nga Kahayag magatultol unta kanimo ngadto nianang Hingpit nga Kahayag.

Manindog kitang tanan, alang sa usa ka gamay'ng panerbisyo sa paghalad.

¹⁴⁸ Atong himoon kining atong gamay'ng kasingkasing, karong gabhiona, usa ka puloy-anan alang kang Cristo. Hinumdumi, karong gabhiona, ang akong talagsaong sugilanon mahitungod sa libodsuroy. Karong gabhiona, sa tinuoray, si Jesus Cristo mao kadtong libodsuroy sa dalan. Husto kana, Siya—Siya usa ka libodsuroy sa dalan. Oh, oo, nagaingon kita, “Ginaalagaran man namo Siya.” Oo. Pinaagi nianang tanang gagilakgilak ug tanang kagarbo, dili kana Siya. Dili kana Siya. Kinahanglan Niyang mamatay aron mahatud Niya kanimo kining Gasa, dili usa ka munyeka, kondili Kinabuhi. Kinahanglan Siyang mamatay aron mahimo kini, aron makaabot kaninyo, kay mao ra gyud kini ang bugtong paagi aron Siya makaabot kaninyo. Dili Siya puede nga moanhi lang ug mahimong usa ka hingpit nga Tawo, sama gayud sa kung unsa Siya, ug moadto kaninyo. Dili Niya mahimo kana sa ingon niana nga paagi. Kinahanglan Siyang mamatay aron mahimo kini, aron madala—madala ang Gasa sa Dios nganha kaninyo. Sama sa—sa libodsuroy nga kinahanglan mamatay aron mahatud niya ang gamay'ng munyeka ngadto sa iyang anak nga babaye, si Cristo kinahanglan usab mamatay aron mahatud ang Dios nganha kaninyo. Gusto nato nga madawat Kini karong gabhiona. Ug nagatoo ako, samtang nagaduko ang atong mga ulo, . . . ug ipataas lang nato ang atong mga kamot ngadto sa Dios ug ihalad pag-usab ang atong mga kinabuhi, dinhi mismo karong gabhiona.

¹⁴⁹ Oh Maloloy-on nga Dios, ginahandum namo—namo ang Imong Gasa. Ako—ania ako, niining panahon sa Kapaskuhan, Ginoo, og naamgo ko ug gitan-aw ko ang kalibutan ug nakita ko ang mga gagilakgilak ug kagarbo niining panahona, ako—makita ko gayud . . . didto, sama sa giingon sa Biblia, sa niining kapanahonan sa Laodicea, nga anaa Ka sa gawas sa Imong iglesia. Usa Ikaw ka sinalikway, usa ka latagaw sa Imong Kaugalingong iglesia ug sa Imong Kaugalingon nga mga katawhan. Ikaw—Ikaw—Ikaw gisalikway. Ang usa—usa ka latagaw mao kanang usa nga wala gidawat, ug Ikaw wala gidawat sa Imong Kaugalingong iglesia. Wala Ka gidawat sa Imong mga katawhan. Ayaw nila Kanimo, Ginoo, ug gibiyaan Ka nila, sama niadtong libodsuroy, didto sa dalan. Dios, Ikaw—

Ikaw—Ikaw nagpadayon sa gihapon, namatay gihapon bisan pa nianang tanan, aron mahatud Mo ang Gasa sa Dios nganhi kanamo. Ug mapainubsanon namong ginadawat Kini, Ginoo. Nagaampo ako nga Imong pun-on ang among mga kasingkasing ug mga kinabuhi. Ug ipahilayo kami sa kalibutan, sugod niining gabhiona, ug hinaut nga kami mahimong Imo gayud sa bug-os samtang among ginahalad ang among kaugalingon diha Kanimo.

¹⁵⁰ Dawata ako, Ginoo. Daghan ang mga sayup sa kinabuhi nga akong nabuhat. Ug, minahal nga Dios, samtang—samtang ako—samtang nagatindog ako dinhi niining sagrado nga dapit kon diin ginawali ang Ebanghelyo ug kon diin nakita Ka namo dinhi, sa usa—usa ka halangdong Kahayag nga midan-ag kanila. Ug kami mapasalamaton kaayo niini, Ginoo. Akong—akong ginahalad ang akong kaugalingon niining Pasko, dili tungod sa . . . ug sama sa ginabuhay sa kalibutan o sa—o sa pagpakli og bag-ong mga panid. Ginoo, akong—gusto lang nako dawaton ang Imong Anak. Akong—gusto nako dawaton ang Imong Gasa, Ginoo.

¹⁵¹ Gusto kong dawaton ang Gasa sa Kinabuhing Walay Katapusan pinaagi kang Cristo. Ug ako, sa tinuoray, Ginoo, ginadawat ang Gasa ni Cristo nga para kanako, aron makakabig og uban pa diha Kanimo. Dios, ang matag usa kanamo . . .


¹⁵² Himoang malumo ug mapainubsanon ang asawa sa panimalay, aron makaagak siya og uban pa nganha Kanimo. Ang Gasa nga Imong ginahatag kaniya, kanang malumo ug maligdong nga kinaiyahan sa babaye, hinaut nga mamahimo siyang maligdong gayud nga babaye hangtud nga makita siya sa iyang mga silingan ug—ug gusto nila nga mahisama usab kaniya.

¹⁵³ Himoa ang lalaki, ang nagatrabaho sa talyer, kung kinsa man siya, Ginoo; himoa nga mapainubsanon ang iyang kinabuhi, sama ni Cristo, aron makita kini sa uban. Wala kami nasayod kung asa na kadtong mga tawo sa gawas, Amahan, apan dili gayud namo gustong biyaan kanang halapad, karaan nga dalan; apan kami'y paatras man, o paabante, adtoon gyud namo bisan asa aron lang nga makab-ot ang usa ka kalag. Itugot nga amo kanang makab-ot, Ginoo, kana ang among pag-ampo. Ug ihatag kanamo ang—ang—ang kinabuhi nga makapadasig sa ubang mga tawo nga magkinabuhi usab nga sama niana, samtang ginahalad namo ang among mga kaugalingon nganha Kanimo, karong gabhiona. Sa Ngalan ni Jesus Cristo. Amen.

Karon, kung inyong iduko ang inyong mga ulo pag-usab, gusto kong manghinaut sa matag usa kaninyo og usa ka malipayon nga Pasko:

¹⁵⁴ Hinaut nga ang halangdong Regalo para sa Pasko, ang Una ug ang bugtong ug ang orihinal ug ang Usa lamang, si Jesus Cristo,

mamahimong lab-as na usab sa inyong kasingkasing karong gabhiona. Hinaut nga ang Balaang Espiritu moanha kaninyo ug magdala diha kaninyo og mga gasa pang-ministerio ug ingon-anang mga butang nga nagagikan sa Dios, aron kamo . . . usa ka gasa aron magkinabuhi kamo og maayong pagkinabuhi. Mao kana ang akong tinguha. Mas gustohon ko pa ang Kinabuhi nga iya ni Cristo nga maania kanako aron magkinabuhi nga malumo ug madaugon kaysa anaa kanako ang tanang mga gasa sa pagpang-ayo, mga gasa sa pagpropesiya, tanan nang uban pang mga gasa; ihatag lang kanako si Jesus. Tugoti ako nga ikinabuhi ang Kinabuhi, ang maong Kinabuhi nga akong gitinguha nga ikinabuhi. Gusto ko og ingon nianang pagkinabuhi aron nga mahibalo ang uban. Mao kana ang akong—mao kana ang akong tinguha karong Pasko, ug nagaampo ako nga mao usab kana ang inyong tinguha. Ug nagaampo ako nga ihatag sa Dios kanato ang Iyang tinguha.

¹⁵⁵ Karon, maminaw úsa kita og pipila ka mga pulong gikan sa pastor, ug dayon pagpapauli na kanato. Ug panalanginan kamo sa Dios. Magkita-kita na usab kita sa Miyerkules sa gabii. Hangtud nianang higayona, panalanginan kamo sa Dios. 

63-1222 Ang Mga Gasa Sa Dios Kanunay'ng
Nagatultol Sa Ilang Mga Dapit
Branham Tabernacle
Jeffersonville, Indiana U.S.A.

CEBUANO

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org